





遊記第五冊上

江陰徐宏祖霞客著

子

寄介立



同邑

季夢良會明編

荆溪金

煜贊猷

楊名時凝齋閱

族孫徐

鎮筠峪

重校

滇遊日記

一缺

季會明曰乙酉七月余宗人季楊之避難於舅氏徐虞卿處顧余於錦見霞客遊記攜滇遊一冊去不兩日虞卿爲盜所殺火其廬記付祖龍是書遭其殘缺亦劫數也今全集唯義興曹駿甫有之初駿甫亦好遊慕霞客之高聞其死詣弔兼求遺書校錄子依以原稿付去逾一年而還今

其全集必存訪而得之甚易也又詩彙一冊仲昭付梓人陳仲鄰仲鄰過難橐亦散失然其詩另爲一冊與記不相屬缺之猶可記缺其一便非完璧當急求之

陳體靜曰余嘗考介翁於宜興史氏購得曹氏底本而此冊中亦僅載游太華顏洞數小記而已其間自五月初九至八月初六凡八十七日日記仍不可得豈駿甫所錄先已非全文耶文章缺陷信乎有數存焉爲之浩歎

鎮按滇一日記已爲燼簡介翁叢殘補治定知非輯綴假合也或者一并汰之直將太華數節別作記外贅筆而滇一則仍闕如豈復成合丙耶茲從陳本編正

遊太華山記

出省城西南二里下舟兩岸平疇夾水十里田盡萑葦滿澤舟行深綠間不復知爲滇池巨流是爲草海草間舟道甚狹遙望西山繞臂東出削崖排空則羅漢寺也又西十五里抵高曉乃捨舟登陸高曉者西山中遜處也南北山皆環而東出中獨西遜水亦西逼之有數百家倚山臨水爲迤西大道北上有傅園園西上五里爲碧雞關卽大道達安寧州者由高曉南上爲楊太史祠祠南至華亭太華盡於羅漢卽碧鷄山南突爲重崖者蓋碧鷄山自西北亘東南進耳諸峰由西南亘東北兩山相接卽西山中遜處故大道從之上置關高

曉實當水埠焉余南一里飯太史祠又南過一邨乃西南上山共三里山半得華亭寺寺東向後倚危峰草海臨其前由寺南側門出循寺南西上南踰支隴入腋共二里東南升嶺嶺界華亭太華兩寺中而東突者南踰嶺西折入大湊間上為危峰下盤深谷太華則高峙谷東與行處平對然路必窮極西腋後乃東轉出腋中懸流兩派墜石窟幽峭險仄不行此徑不見也轉峽又東盤山嘴共一里俯瞰一寺在下壑乃太平寺也又南一里抵太華寺寺亦東向殿前夾墀皆山茶南一株尤巨異前廊南穿廡入閣東向瞰海然此處所望猶止及草海若灩灩浩蕩觀當更在羅漢寺南也遂出南側門

稍南下循塢南入又東轉一里半南踰嶺嶺自西峰最高處東垂下有大道直上為登頂道截之東南下復南轉遇石峰嶙峋南擁輒從其北東向墜土坑下其一里又西行石叢中一里復上躡崖端盤崖而南見南崖上下如峰房燕窩纍累欲墮者皆羅漢寺南北菴也披石隙稍下一里抵北菴已出文殊巖上始得正道由此南下為羅漢寺正殿由此南上為朝天橋橋架斷崖間上下皆嵌崖此復嶄崖中墜橋度而南即為靈官殿殿門北向臨橋由殿東側門下攀崖躡峻愈上愈奇而樓供純而殿供元而閣供玉而宮名抱皆東向臨海嵌懸崖間每上數十丈得斗大平崖輒杙空架隙成之故諸

殿俱不巨而點雲綴石亘爲披映至此始擴然全收水海之勝南崖有亭前突北崖橫倚樓樓前高柏一株浮空漾翠並樓而坐如倚危檣上不復知有崖石下藉也抱一宮南削崖上杙木棧穿石穴棧懸崖樹穴透崖隙皆極險峭度隙有小樓粘石端寢龕炊竈皆具北菴景至此而極返下朝天橋謁羅漢正殿殿後崖高百仞崖南轉折間泉一方淳崖麓乃朝天橋迸縫而下者目勺冷泉南踰泉卽東南折其上崖更崇列中止澗坪一縷若腰帶下悉隕阪崩崖直插海底坪間梵宇仙宮雷神廟三佛殿壽佛殿關帝殿張仙祠真武宮次第連綴真武宮之上崖愈傑竦昔梁王避暑於此又名避暑臺爲南菴盡處上卽穴石

小樓也更南則菴盡而崖不盡穹壁覆雲重崖拓而更合南絕壁下有猗蘭閣址還至正殿東向出山門凡八折下二里抵山麓有邨氓數十家俱網罟爲業邨南卽龍王堂前臨水海由其後南循南崖麓邨盡波連崖勢愈出上已過猗蘭舊址南壁愈拓削一去五里黃石痕掛壁下土人名爲掛榜山再南則崖迴嘴突巨石壘空嵌水折成壘南復分接屏壁雄峭不若前而兀突離奇又開異境三里下瞰海涯舟出沒石隙中有結茅南涯側者亟懸仄徑下得金線泉泉自西山透腹出外分三門大僅如盎中崆峒悉巨石欹側不可入水由盜門出分注海海中細魚溯流入洞是名金線魚魚大不踰

四寸中腴脂首尾金一縷如線爲滇池珍珠泉北半里有大石洞洞門東瞰大海卽在大道下崖傾莫可墜必迂其南始得透迤入卽前所望石中小舟出沒處也門內石質玲透裂隙森柱俱當明處南入數丈輒暗覓炬更南洞愈崇拓共一里始轉而分東西向東上三丈止西入窈窕莫極懼火炬不給乃出上山返抱一宮問山頂黑龍池道須北向太華中乃南轉然池實在山南金線泉絕頂以此地崖崇石峻非攀援可至耳余輒從危崖厯隙上壁雖峭石縫多稜懸躍無不如意壁紋瓊葩瑤莖千容萬變皆目所未收素習者惟牡丹枝葉離披布滿石隙爲此地絕邁乃結子垂垂外緣中紅又余

地所未見土人以高遠莫知採鑿第曰山間野藥不辨何物也攀躋里餘遂躡巔則石萼鱗鱗若出水青蓮平散竟地峰端踐側鐸而南惟西南一峰最高行峰頂四里凌其上爲碧雞絕頂頂南石萼駢叢南墜又起一突兀峰高少遜之乃南盡海口山也絕頂東下二里已臨金線泉之上乃於聳崖間觀黑龍池而下

滇中花木記

滇中花木皆奇而山茶山鵲爲最山茶花大逾碗攢合成球有分心卷邊軟枝者爲第一省城推重者城外太華寺城中張石夫所居朶紅樓樓前一株挺立三丈餘一株盤垂幾及

半畝垂者叢枝密幹下覆及地所謂柔枝也又爲分心大紅遂爲滇城冠山鵲一花具五色花大如山茶聞一路迤西莫盛於大理永昌境花紅形與吾地同但家食時疑色不稱名至此則花紅之實紅艷果不減花也

遊顏洞記

臨安府顏洞凡三爲典史顏姓者所開名最著余一至滇省每飯未嘗忘鉅鹿也遂由省中南過通海縣遊縣南之秀山上一里半爲灑穹宮宮前巨山茶二株曰紅雲殿宮建自萬曆初距今裁六十年山茶樹遂冠南土又南抵臨安府城南臨瀘江此江西自石屏州異龍湖來東北穿出顏洞而合郡

衆水亦以此洞爲洩水穴也於是覓一導遊者於城東接待寺顏洞大道當循城而南渡瀘江橋導者從寺前隔江東北小路行遂不得渡瀘江東觀三溪會合處由寺北循塘岸東行塘東皆紅蓮覆池密不見水東北十五里渡賽公橋水自西北來東南入瀘又五里上山爲金鷄哨南瀘江會諸水由此東入峽峽甚逼水傾其中東抵洞口尙里餘望洞頂石崖雙劈如門對峙洞正透其下重岡迴夾之不可得見求土人導入皆曰水漲流急此非遊時若兩月前水涸可不橋而入今卽有橋亦不能進况無橋耶橋非一處每洞中水深處輒架木以渡徃例按君來遊架橋費且百金他費亦百金土

人苦之乘普西兵變託言洞東卽阿迷境叛人嘗出沒此遂絕官長遊洞者余必欲一至洞門土人曰須渡江南岸隨峽入所謂瀘江橋大道也始悔爲導者悞乃捨水洞覓南明萬象二陸洞從峭東下坡復上山登頂東瞰峽江環峽東入洞門卽在東峽下余所登山處正與其上雙崖平對門猶爲曲掩但見峭崖西向湧水東傾搗穴吞流之勢已無隱形矣東北三里踰嶺脊下山二里則極東石壁迴聳如環半城下開洞門北向余望之有異從之直下一里抵峽中又一里半抵東壁下稍南上洞門廓然大書雲津洞蓋水洞中門也遊顏洞以雲津爲奇從前門架橋入出後門約四五里暗中傍

水行中忽關門延景其上又絕壁迴環故自奇絕余不能入其前洞而得之重愕絕巘間且但知萬象南明不復知有雲津也誠出余意外遂瞰洞而下洞底水從西南穴中來盤門內而東復入東南穴去余下臨水湄徑之水濶三丈洞高五六丈而東西當門透明處徑可二十丈但水所出入直逼外壁故非橋莫能行出水西穴漸暗不可遠窺東爲水入穴處稍旁拓隔水眺之中垂列乳柱繽紛窈窕復上出洞外上眺東南北三面俱環壁無可上仍西出舊道北上山東一里踰嶺已陟東壁迴環上嶺塢中東向一里其地南北各起層峰石崖時突萬象洞卽在北崖上乃導者妄謂在南崖下直下

者一里抵南崖一洞東向高四丈水從中湧出兩崖角起前對爲峽水出洞破峽勢極雄壯蓋水洞後門也又東二里抵老鼠邨執途人問之萬象洞在西北嶺上卽前所從下山處洞甚深歷降而下底與水洞通余欲更至洞門晚色已合去宿館尙十里念此三洞慕之數十年趨走萬里乃至而叛棄阻之陽侯隔之太陽促之導人又誤之生平遊屐斯爲最阨矣

隨筆二則

黔國公沐昌祚卒子啟元嗣爵邑諸生往祭其父中門啟一生翹首內望門吏杖箠之多士怒亦箠其人反爲衆桀奴所

傷遂懇於直指金公公諱璫將逮諸奴奴聳啟元先疏誣多士事下御史金逮奴如故啟元益嗔徵兵祭纛環直指門發巨炮恐之金不爲動沐遂掠多士數十人毒痛之囊其首於木金戒多士毋與爭急疏聞下黔督張鳴雀勘張奏以實時魏璫專政下調停旨而啟元愈猖狂不可制母宋夫人懼斬世緒泣三日以毒進啟元隕事乃解宋夫人疏請孫穉未勝爵服乞權署名俟長賜襲會今上登極憐之輒賜勅實授卽今嗣公沐天波時僅歲一周支也

普名勝者阿迷州土寇也祖者輅父子爲亂三鄉維摩間萬曆四十二年廣西郡守蕭以裕調寧州祿土司兵合勦一鼓

破之輅父子俱就戮始復維摩州開三鄉縣時名勝走阿迷甯州祿洪欲除之臨安守梁貴夢郡紳王中丞撫民畏甯州強留普樹之敵曲庇名勝初猶屯阿迷境後十餘年兵頓強殘破諸土司遂駐州城盡奪州守權崇禎四年撫臣王伉憂之裹毡笠同二騎潛至州悉得其叛狀疏請勦上命川貴四省合勦之石屏龍土司兵先薄漾田爲所殲三月初八日王中丞親駐臨安布政周世昌統十三參將將本省兵萬七千人逼沈家墳賊命黎亞選扼之不得進相持者二月五月初二日亞選自營中潛往爲名勝壽醉返營一童子洩其事於龍龍與王土司夜劫之遂斬黎進薄州城環圍四月卒不下

時州人廖大亨任職方卽賊恃爲奧援潛使使入京縱反間謂普實不叛王撫起釁徵功百姓悉糜爛于是部郎疏論普地不百里兵不干人卽叛可傳檄定何騷動大兵爲而王宮論錫袁楊庶常繩武各上疏言宜勦事下樞部議先是王撫疏名勝包藏禍心已久前有司養疽莫發奸致成難圖蔓草上因切責前撫按而前撫閱洪學已擢冢宰懼勿能自解卽以飛語慫恿大司馬大司馬已先入部郎言遂謂名勝地不當一縣撫按比周張大其事勢又延引日月徒虛糜縣官餉疏上嚴旨逮伉及按臣趙世龍十月十五撫按俱臨安就逮十二月十八周世昌中銃死十三參將悉戰沒五年正月朔

賊悉兵攻臨安詐郡括萬金犒之受金攻愈急迨十六城垂破賊忽退師以何天衢襲其穴也天衢江右人居名勝十三頭目之一見名勝有異志心不安妻陳氏力勸歸中朝天衢因乞降當道以三鄉城處之今遂得其解圍力後普屢以兵攻三鄉各相拒無所勝乃退兵先修祖父怨于甯州方攻甯時洪已奉調中原其母集衆目人犒五金京青布二各守要害賊不得入後洪返謂所予太重責之金諸族目悉解體賊謀知乘之入洪走避撫仙湖孤山州爲殘破歲餘洪復故土鬱鬱死賊次攻石屏州及沙土司等十三長官悉服屬之志欲克維摩州南魯白城卽大舉魯白城在廣南西南七日程

臨安東南九日程與交趾界城天險爲白彝所踞名勝常曰進圖中原退守魯白吾無憂矣攻之三年不能克七年九月忽病死子福遠方九歲妻萬氏多權畧威行遠近當事者姑以撫了局釀禍至今自臨安以東廣西以南不復知有明官矣至今臨安不敢一字指斥旅人詢及者輒揜口相戒府州文移不過虛文予過安莊見爲水西殘破者各各有同仇志不惜爲致命而此方人人沒齒無怨言不意一婦人威畧乃爾南包沙土司抵蒙自縣北包彌勒州抵廣西府東包維摩州抵三鄉縣西抵臨安府皆其橫壓之區東唯三鄉何天衢西唯龍鵬龍在田猶與抗鬪餘皆聞風潛伏有司爲之籠絡

仕紳受其羈勒者十八九王伉以啟釁被逮後人苟且撫局
舉動如此朝廷可謂有人乎夫伉之罪在悞用周世昌不諳
兵機彌連數月兵久變生耳當時止宜責其遲留策其後效
臨敵易帥且不可遽就軍中逮之亦太甚矣嗟乎朝廷於東
西用兵事事如此不獨西南彝也

滇遊日記二

戊寅八月初七日余作書投署府何別駕求廣西府志是日其
誕辰不出堂書不得達入堂閱其四境圖見盤江自其南界
西半入境東北從東界之北而去不標地名無從知其何界
也

初八日何收書欲相見以雨不往

初九日余令顧僕辭何不見促其志彼言卽送至而終不來
是日復大雨不止

初十日何言覓志無印就者已復命殺青矣是日午霽始見

黃菊大開

菊惟黃色不大
又有西番菊

廣西府西界大山高列如屏直

亘南去曰草子山西界卽大麻子嶺從大龜來者東界峻逼
而西界層疊北有一石山森羅於中連絡兩界曰發果山東
支南下者結爲郡治西支橫屬西界者有水從穴湧出甚巨
是爲瀘源經西門大橋而爲矣邦池之源者也

通海從穴湧
出此海亦從

穴湧出然此海南山復橫截仍入大守塘山穴中尤爲異也
廣福僧言此水入穴卽從竹園邨北龍潭出未知果否恐龍

潭自是錫岡北塢水此未必合出也矣邦池俗名海子又曰龍甸此瀘江非廣中瀘江也瀘江在南而此水亦竊其名不知矣邦池之南復有遠山東西橫屬則此中亦一南北中窪之坑而水則去來皆透於穴矣此郡山之最遠者也發果山圓若貫珠橫列郡後東下一支曰奇崔峰則學宮所托西下一支曰鐵龍峰則萬壽寺所倚而郡城當其中環處城之東北亦有一小石峰在其中曰秀山上多突石前而瞰湖後可攬翠城南瀕湖復突三峰東即廣福曰靈龜山中峰最即名翠屏小曰文筆峰建塔於上而西峰橫若翠焉此郡山之近者也秀山前有伏波將軍廟後殿為伏波像前殿為郡守張繼孟祠張扶風人以甲科守此壬申為普西困城岌岌矣張奮不顧身固保城墮普莫能破城得僅存先是張夢

馬伏波示以方畧後遂退賊二月終親蒞息宰河招撫焉州人服其膽畧賊稱為捨命王云

新寺 即萬壽寺

當發果西垂之南其後山石嶙峋為滇中所無其寺南向後倚峭峰前臨遙海亦此中勝處前有玉皇閣東為城隍廟俱在城外瀘源洞在城西北四里新寺後山西盡環塢而北其中亂峰襍沓綴以小石岫皆削瓣駢枝標青點翠北環西轉而瀘源之水湧於下穴瀘源之洞闢於層崖有三洞焉上洞東南向前有亭下洞南向在上洞西五十步皆在前山之南崖後洞在後山之北岡其上如智井從井北墜穴而下二十步底界而成脊一穴東北下而小一穴東南下而廓此三洞之分向也其中所入皆甚深秉炬穿隘屢起屢伏乳柱紛

錯不可窮詰焉

十一日大霽上午出西門過城隍廟玉皇閣前西一里轉新寺西峰之嘴而北又北一里見西壑漲水盈盈而上洞在其西北矣由岐路一里抵山下厯級遊上洞望洞西有寺殿兩重入憩而瀹水爲餐余因由寺西觀水洞還寺中索炬始知爲洞有三洞皆須火深入下午強索得炬而火爲顧僕所滅遍覓不可得遙望一邨在隔水之南漲莫能達遂不得爲深入計聊一趨後洞之內披其外扇還入下洞之底探其中門而已仍從舊路歸北入新寺抵暮而返

十二日早促何君志猶曰卽送至坐寓待之擬一至卽行已而竟日復不可得晚謂顧僕曰志現裝釘俟釘成帙卽來候也余初以爲廣西郡人必悉盤江所出遍徵之終無諳者其不知者反謂西轉彌勒旣屬顛倒其知者第謂東北注羅平經黃草壩下卽莫解所從矣間有謂東南下廣南出田州亦似揣摩之言靡有確據也此地至黃草壩又東北四五日程余欲從之以此中淹留日久迤西之行不可遲姑留爲歸途之便 廣西府鸚鵡最多皆三鄉縣所出然止翠毛丹喙無五色之異 三鄉縣乃甲寅蕭守所城 維摩州州有流官祇居郡城不往州治二處皆藉何天衢守之以與普拒 廣福寺在郡城東二里吉雙鄉在矣邦池之東南與之對而

彌勒州在郡西九十里一統志乃注寺在彌勒東九十里鄉
爲彌勒屬何耶豈當時郡無附郭三州各抵其前爲界故以
屬之彌勒耶然今大麻子哨西何以又有分界之址也

十三日中夜聞雷聲達旦而雨初余欲行屢矣而日復一日
待之若河清焉 自省至臨安皆南行自臨安抵石屏州皆
西北自臨安抵阿迷皆東北自阿迷抵彌勒皆北行自彌勒
抵廣西府皆東北

十四日再令顧僕往促志余束裝寓中以待乍雨乍霽上午
得回音仍欲留至明晨云乃攜行李出西門入玉皇閣閣頗
宏麗中乃銅像而兩廡塑羣仙像極有生氣正殿四壁畫亦

精工遂過萬壽寺停行李於其右廡飯後登寺左鐵龍峰之

脊石骨稜稜皆龍鱗象角也

志又稱爲天馬峰以其形似也

既下還寺中見

右廡之北有停柩焉詢之乃吾鄉徽郡游公柩也游諱大勳
任廣西三府征普時游率兵屯郡南海梢以防寇之衝突四
年四月普兵忽乘之游竟沒於陣今其子現居其地不得歸
故停柩寺中余爲慨然是晚遇李如玉楊善居諸君作醮寺
中屢承齋餉僧千松亦少解人意是晚月頗朗

十五日余入城探游君之子令顧僕往促何君上午出西門
遊城隍廟既返寺寺中男婦進香者接踵有吳錫爾者亦以
進香至同楊善居索余文各携之去約抵暮馳還抵午顧僕

回言何君以吏釘志久遲撲數板限下午卽備料不過期矣
下午何命堂書送志及程儀至余作書謝之是晚爲中秋而
晚雲密布旣暮而大風忽吼僧設茶於正殿遂舖餼而卧
十六日雨意霏霏不能阻余行色而吳楊文未至令顧僕往
索之旣飯楊君携酒一樽侑以油餅熏鳧乃酌酒而携鳧餅
以行從玉皇閣後循鐵龍東麓而北一里登北山而上一里
逾其峒卽發果山之脊也志又謂之九華山蓋東峰之南下
者爲奇鶴爲學宮所倚西峰之南下者爲鐵龍爲萬壽寺之
脈中環而南突於城中者爲鍾秀山其實一山也從嶺上半
行又北三里始見瀘源洞在西而山脊則自東界大山橫度

而西屬於西界爲郡城後倚然瀘源之水穿其西穴而出亦
不得爲過脈也從嶺北行又五里而稍下有哨在塢之南岡
曰平沙哨郡城北之鎖鑰也其東卽紫微之後脈猶屏列未
盡其西則連峰蜿蜒北自師宗南下爲阿盧山界塢中之水
而中透瀘源者也由哨前中行塢中六里有溪自北而南小
石梁跨之是爲矣各橋溪水發源於東西界分支處由梁下西
注南轉塢窮而南入穴出於瀘源之上流也又北六里有邨
在西山之半溪峽自東北來路由西北上山一里躡嶺而上二
里遂逾西界之脊於是瞰西塢行塢中水浸成壑有邨在其
下其西復有連山自北而南與此界又相持成峽焉從嶺上

又北四里乃西北下西峽中一里抵麓復循東麓北行十五里復有連岡屬兩界之間有數家倚其上是為中火鋪有公館焉按志師宗南四十里有額勒哨當即此矣飯仍北行峽中其內石峰四五離立崢嶸峽西似有溪北下路從峽東行兩界山復相持而北塢中皆荒茅沮洳直抵師宗寂無片椽矣聞昔亦有邨落自普與諸彝出沒莫禁民皆避去遂成荒徑廣西李翁為余言師宗南四十里寂無一人居因普亂民不安居龜山督府今亦有普兵出沒路南之道亦梗不通一城之外皆危境云龜山為秦土官寨其山最高為彌勒東西山分脈處共西即北屬陸涼西屬路南為兩州間道向設督捕城今漸廢弛秦土官為昂土官所殺昂復為普所擄今普兵不時出沒其地人不敢行往路南澂江者反南迂彌勒從北而向革泥關焉蓋自

廣西郡城外皆普氏所僱服即城北諸邨小民稍溫飽輒坐派其貲以供如違即全家擄掠而去故小民寧流離四方不敢一鳴之有司以有司不能保其命而普之殺生立見也北行二十里經塢而西從塢中度一橋有小水自南而北涉之轉而西北行暝色已合顧僕後余從一老人一童子前行躑躅昏黑中余高聲呼顧僕老人輒搖手禁止蓋恐匪人聞聲而出也循坡陟峽十里有一尖峰當峽中穿其腋復西北行其處路甚濶蹊水交流路幾不辨後不知顧僕趨何所前不知師宗在何處莽然隨老人行而老人究不識師宗之遠近也老人初言不能抵城隨路得邨井不得師宗余還叩之老人曰余昔過此已經十四年前此遺處有邨不意竟滄桑莫辨久之漸聞犬吠聲隱隱真如空谷之音知去人境不遠過尖山共五里下

涉一小溪登坡遂得師宗城焉抵東門門已閉而外無人家
 循城東北隅有草茅數家俱已熟寢老人仍同童子去余止
 而謀宿莫啟戶者心惶惶念顧僕負囊山荒路寂泥濘天黑
 不知何以行且不知從何行久之見暗中一影亟呼而得之
 而後喜可知也既而見前一家有火趨叩其門始固辭余候
 久之乃啟戶入淪湯煮楊君所貽粉糕啖之甘如飴也濯足
 藉草而卧中夜復聞雨聲

主人為余言今早有人自府來言
 平沙有沙人截道君何以行余曰

無之曰可徵君之福也土人與之相識猶被索肥始放君之
 不遇豈偶然哉即此地外五里尖山之下時有賊出沒上人
 未晚即不敢行何
 幸而昏夜過之 師宗在兩山峽間東北與西南俱有山

環夾其塢縱橫而開洋不整亦不大水從東南環其北而西

去亦不大也城雖磚甃而甚卑城外民居寥寥皆草廬而不
 見一瓦其地哨守之兵亦俱何天衢所轄 城西有通元洞
 去城二里又有透石靈泉俱不及遊

十七日晨起雨色霏霏飯而行泥深及膝出門即仆北行一
 里有水自東南塢來西向注峽而去石橋跨之為綠生橋過
 橋行塢中一里北上坡遵坡行八里東山始北斷成峽水自
 峽中西出有寨當峽而峙不知何名余從西坡北下則峽水
 西流所經也坡下亦有茅數家為往來居停之所是曰大河
 口河不甚巨而兩旁沮洳特甚有石梁跨之與綠生同其水
 勢亦與綠生相似過橋北行度塢塢北復有山自東北橫亘

西南一里陟其坡循之東向行三里越坡東下塢中沮洳有小水自北而南入大河溪上流有四五人索哨錢於此因架木爲小橋以渡見余不索哨而乞造橋之稿余畀以二文各交口稱謝既渡半里余隨車路東行諸人哄然大呼余還顧則以羅平大道宜向東北余東行爲悞故也亟還從東北半里復上坡東行於是皆荒坡遙隴風霧遠迷重茅四塞十五里東逾岡始望見東北岡上有寨一屯其前卽環山成窪中有盤壑水遶其底而成田迴陞四顧皆高不知水所從出從岡東下一里越塢中細流其塢與流皆自南而北卽東通盤壑者又東上一里循壑之南脊行與所望北岡之寨正隔塢

相對矣又逾東岡稍下一里則盤壑之東有峽穿隴中而至其峽自東南大山破壁而至者峽兩崖皆巨壁其上或中剖而成峽或上覆而成梁一塢之中倏斷倏續水亦自東南流穿盤壑但壑中不知何洩時余從石梁而度水流其下不知其爲梁也望南北峽中水一從梁洞出一從梁洞入乃從梁東選石踞勝瞰峽而坐睇其下如連環夾壁明暗不一曲折透空但峽峭壁削無從下穿其穴耳於是又東愈岡塢相錯再上再下八里盤嶺再上至是夙霧盡開北有削崖近峙南有崇嶺遙穹取道其間橫陟嶺脊始逼北崖旋向南嶺二里復逾高脊北轉東下二里有茅當兩峰峽間前植哨竿空而

無人。是日張飛哨山中之最幽險處也。又東下三里懸壑深
闌草木蒙密泥濘及膝。是名偏頭哨。不見居廬。路口止有
一人懸刀植鎗而索錢。余不之與。而過此哨之南。卽南穹崇
嶺。羅平賊首阿吉所窟處。爲中道最險。故何兵哨守焉。又名
新哨。而師宗界止此矣。過哨又東上嶺。嶺更峻。石骨稜厲。二
里躋其巔。是爲羅平師宗之分界。亦東西二山之分界也。嶺
重
山複上下六十里
險峻爲迤東之冠其山蓋南自額勒度脈分支北下結成崇
嶺。北度此脊而爲白蠟束龍。而東盡於河底盤江交會處者
也。從嶺上東向平行。其間多墜壑。成窞小者爲罅。井大者爲
盤窞。皆叢木其中。密不可窺。而峰頭亦多樹。多石不若師宗

百土山。茅脊也。平行嶺上。五里路左有塲。宿火樹間。是爲中
火鋪。乃羅平師宗適中之地。當午有土人擔具携炊賣飯於
此。而旣過時。輒去。余不及矣。乃冷餐所携飯。又東一里。漸下
又一里。南向下叢中。其路在箐石間。泥濘彌甚。一里遂架木
爲棧。嵌石隙中。非懸崖沿壁。而或斷或續。每每平鋪當道。想
其下皆石孔。罅井。故用木補填之也。又東下一里。始出峽口。
迴顧西壑。崇嶺高懸。皆叢箐密翳。中有人聲。想有彝人之居
而外不能見。東眺則南界山岡平亘。北界則崇峰屏立。相持
而東。於是循北坡東行三里。復北上坡。直抵北界峰腰。緣之
三里。峰盡。東下有塲。縱橫一塲。從北峽來。一塲從東峽來。一

塢從西峽來一塢向東南去時雨色復來路復泥濘計至羅平尚四十里行不能及聞此中有營房一所可宿欲投之四顧茫無所見祇從大道北轉入峽遂緣峽東小嶺而上一里忽遇五六人持矛挾刃而至顧余曰行不及州矣予問營房何在曰已過可宿乎曰可遂挾余還蓋此輩卽營兵乃送地方巡官過嶺而返者仍一里下山抵塢中乃向東塢入半里抵小峰之下南向攀峰而上峻滑不可着足半里登其巔則營房在焉營中茅舍如蝸上漏下濕人畜雜處其人猶沾沾謂予公貴人使不遇余輩而前無可托宿奈何雖營房卑隘猶勝彘居十倍也

彘謂黑白與羅

余領之索水炊粥峰頭水甚艱

以一掬濯足而已

十八日平明雨色霏霏余謂自初一漾田晴後半月無雨恰中秋之夕在萬壽寺狂風釀雨當復有半月之陰營兵曰不然予羅平自月初卽雨並無一日之晴蓋與師宗隔一山而山之西今始雨山之東雨已久甚乃此地之常非偶然也余不信飯後下山

飯以筍爲案筍出山箐深處八月正其時也

濇滑更甚於昨而濃

霧充塞較昨亦更甚一里抵昨所入塢中東北上一里過昨所返轅處又一里逾山之岡於是或東或北盤旋嶺上八里稍下有泉一縷出路左右穴中其石高四尺形如虎頭下層若舌之吐而上有一孔如喉水從喉中溢出垂石端而下墜

喉孔員而平僅容一拳盡臂探之大小如一亦石穴之最奇者余時右足為污泥所染以足向舌下就下墜水濯之行未幾右足忽痛不止余思其故而不得曰此靈泉而以濯足山靈罪我矣請以佛氏懺法解之如果神之所為祈十步內痛止及十步而痛忽止余行山中不喜語怪此事余所親驗而識之者不敢自諱以沒山靈也從此漸東下五里抵一盤壑中有小水自北而南四圍山如環堵此中窪之底也豈南流亦透穴而去者耶又上東岡二里逾岡又東下一里行塢中者三里有小水自西北向東南至是始遇明流之澗有小橋跨之既度澗從東南去路復東上岡三里逾岡之東始見東

塢大闢自南而北東界則遙峰森峭志稱羅莊山駢立東南西界

則崇嶽巍峩志稱白蠟山屏峙西北東北又有一山土人稱為橫東龍山

排於兩界缺處而猶遠不睹羅平城近莫見與哆囉也與哆囉即

在山下以嶺峻不能下瞰耳又東稍下者二里峻下者一里遂抵塢中則

與哆囉茅舍數間倚西山東麓焉從此遂轉而北行塢中其

塢西傍白蠟東瞻羅莊南去甚遙則羅莊自西界老脊分枝

而東環處也塢中時有土岡自西界東走又有石峰自東界

西突路依西界北行遙望東界遙峰下峭峰離立分行競穎

復見粵西面目蓋此叢立之峰西南始于此東北盡于道州

磅礴數千里為西南奇勝而此又其西南之極云過與哆囉

遊滇一
北一重土岡東走卽有一重小水隨之想土岡之東有溪北注以受此諸水數涉水逾岡北五里望西山高處有寨聚居頗衆此囉囉寨也又北二里有池在東岡之下又北二里有池在西岡之下皆岡塢環轉中窪而成者又北三里有水成溪自西而東向注甚急一石梁跨之是爲魯彛橋橋下水東南數里入穴中越橋北始有夾路之居又北半里有水自西而東注其水不及魯彛之半卽從上流分來亦東里餘而減亦一石梁跨之二水同出於西門外白蠟山麓龍潭中分流城東南而各墜地穴亦一竒也橋之南始有盈禾之塍又北半里入羅平南門半里轉東一里出東門停憩於楊店是日

爲東門之市旣至而日影中露市猶未散因飯於肆觀於市市新榛子薰鷄蓼還楊店而雨濛濛復至時有楊媚姜渭濱者荊州人贅此三載矣頗讀書知青烏術詢以盤江曲折能隨口而對似有可據者先是余過南門橋有老者巾服而踞橋坐見余過拉之俱坐予知其爲土人因訊以盤江彼茫然也彼又執一人代訊其人謂山澂江返天上可笑也渭濱言盤江南自廣西府流東北師宗界入羅平之東南隅羅莊山外抵八達彝寨會江底河經巴澤河格巴吉興龍那貢至壩樓爲壩樓江遂東南下田州不北至黃土壩亦不至普安州第壩樓諸處與普安界亦相交錯是南盤亦經普安之東南

界特未嘗與東北之北盤合耳 羅平在曲靖府東南二百餘里舊名羅雄亦土州也萬曆十三年土酋者繼榮作亂都御史劉世曾奉命征討臨元道文作率萬人由師宗進夾攻平之改爲羅平明年繼榮目把董仲文等復叛羈知州何倓文作以計出之復率兵由師宗進討平之今遂爲迤東要地

羅平州城西倚白蠟山下東南六十里爲羅莊山東北四十里爲束龍山有水自白蠟麓龍潭出名魯彝河東環城南出魯彝橋而東入地穴其北有分流小水亦如之此內界之水也其西有蛇場河自州西南環州東北抵江底河俱在白蠟束龍二山外其東南有盤江自師宗東北八境東南抵八

達俱在羅莊山外此外界之水也 州城磚甃頗整州治在

東門內俱民惟東門外頗成闐闐西南二門爲賊首官霸仲家

巢在正南八十里 烏魯河師宗界 阿吉 羅羅巢在州西南七十里偏頭南大山下 二寇不時劫掠

民不能居 白蠟山在城西南十餘里頂高十餘里其麓卽

在西門外二里上有尖峰南自偏頭寨北抵州西北爲磨盤

山過脉而東又起爲束龍山者也此山雖晴霽之極亦有白

雲一縷橫亘其腰如帶圍爲州中一景 束龍山在城東北

四十里者繼榮叛時結營其上爲巢窟官兵攻圍久之內潰

而破今其上尙有二隘門 羅莊山在城東南六十里其山

參差森列下多卓錫拔笋之岫粵西石山之發軔也 羅平

州東至廣南八達界二百里西南至師宗州偏頭哨六十里南至師宗州烏魯河界八十五里西南至陸涼蛇場河界一百里西北至舊越州界發郎九十里北至亦佐縣桃源界一百二十里東北至亦佐縣黃草壩二百里 羅平州正西與滇省對正東與廣西思恩府對正北與平彝衛對正南與廣西府永安哨對

十九日坐雨逆旅閱廣西府志下午有伍左李三生來拜

二十日雨阻逆旅

二十一日亦雨阻逆旅

二十二日早猶雨霏霏將午乃霽澣濯污衣且補紉之下午

入東門仍出南門登門外二橋觀魯彝河詢之士人始知其西出白蠟山麓龍潭仍東入地穴者也還入南門上城行抵西門望白蠟山麓相去僅三里有土岡一層廻之魯彝發源即從其麓透穴而出者也稍北即東轉經北門其西北則磨盤山峙焉為州城來脈城東北隅匯水一塘其下始有禾畦即東門接壤矣其城乃東西長而南北狹者也
二十三日晨起陰雲四布飯而從行其街從北去居民頗盛一里出北隘門有岐直北過嶺者為發郎道其嶺即自西界磨盤山轉而東行者板橋大道從嶺南東轉東北向行十里有邨在北山之下曰發近德其處南開大塢西南即白蠟東

南即大堡營山大堡營之南一支西轉卓起一峰特立於是
邨之南爲正案其南則石峰參差遙列即昨與哆囉所望東
南界山也又東屢有小水南去渡之東五里有石峰突兀當
關北界即磨盤東轉之山南界即大堡山諸石峰相湊成峽
而石峰當其中若蹲虎然由其東南腋行南界石山森森成
隊南去而路漸東北上五里出當關峰之東其東垂有石特
立上有斜騫之勢是曰金雞山所謂金雞獨立也又東一里
一洞在南小峰下時雨陣復來避入其中飯又東三里東上
峽脊其脊即磨盤山東走脉至此又度而南爲大堡營東山
者也一里逾脊之東其上有岐南去不知往何曩寨脊東環

窪成塢有小水北下注東南塢中稻禾盈塍有數家倚北峰
下曰沒奈德東峰下有古殿二重時雨勢大至趨避久之乃
隨水下東南峽峽逼路下兩旁山勢仍覺當人面而起東行
峽中二里有水自峽南洞穴出與峽水同東注又一里有小
石梁跨溪逾之從溪南東行一里溪北注峽路東逾岡一里
餘有塢自西北來環而南其中田禾芄彘邨落高下東二里
有數十家夾路曰山馬彘亦重山中一聚落也於是又東北
一里石峰高亘逾其南坡抵峰下又東南一里有塘在山塢
五六家傍塢而栖曰換澤邨又東北二里爲三板橋數家踞
山之岡其橋尙在岡下時雷雨大至遂止於岡頭上寨

二十四日主人炊飯甚早平明卽行雨色霏霏路滑殊甚下坡卽有小石梁其下水亦不大自西而東注乃出於西北石穴而復入東北穴中者其橋非板而石而猶仍其舊名橋南復過一寨乃東向行坡間二里有岐當峽從東北者乃入寨道從直東者爲大道從之直東一里登岡上其北有塢在北大山下卽寨聚所托有中禾芄焉岡南小石峰排立岡頭自東而西遂與北山環峙爲峽入峽東行四里逾脊北上半里入其峒其北四峰環合中有平塢經之而北西峰尤突兀焉北半里又穿峒半里復由峽中上一里直抵北巨峰下其峰聳亘危削如屏北障其西有塢下墜北去其中箐深霧黑

望之杳然路從峰南東轉遂與南峰湊峽甚逼披隙而東半里其東四山攢沓峰高峽逼叢木蒙密亦幽險之境也遂循南峰之東南向入塢半里乃東南上半里逾岡脊而東其東有塢東下路從岡頭南向行一里復出南峒其峒東西兩峰從岡脊起路出其側復東向行三里始稍降而復上於是升降曲折多循北嶺行與南山相持成塢六里路從塢而東又五里稍上逾峒南北峽始開再東盤北嶺之南三里始見路旁餘薪爨灰知爲中火之地從其東一里下峽始得石路迤邐南向平行下二里俯見南塢甚杳循北嶺東向行一里忽聞溪聲沸然又南下抵塢中一溪自東而西有石梁跨之溪

遊記 卷一
中水頗大而甚急四顧山迴谷密毫無片隙不知東北之從何來不知西南之從何洩當亦是出入於竅穴中者欲候行人問之因坐飯橋上久之不得過者乃南越橋行仰見橋南有岐躡峰直上有大道則溯溪而東時溪漲路渾攀南峰之麓行念自金鷄山東上一路所上者多而下者無幾此溪雖流塢中猶是山巔之水也東一里循南峰東麓轉而南隔塢東望溪自東北峽中破崖而出其內甚逼路捨之南半里復循南峰南麓轉而西向入塢一里塢窮遂西上嶺一里逾嶺頭始見有路自北來合并由嶺上南去此卽橋南直上之岐逾高嶺而下者較此爲逕直云由嶺而南行西瞰甚深而等

密泉沸亦不辨其從何流也又南二里轉而東循北嶺南崖東向行亦與南山下夾成塢下瞰深密與西塢同東五里其塢漸與西塢並始知山從東環塢乃西下者又東向逾岡東北一里度一脊其脊東西度從其東復上嶺一里則嶺東有塢南北關乃北轉循西山行塢上一里塢窮從塢北平轉逾東嶺之東其二里有數家在路北坡間是曰界頭寨以羅平村落東止於此也又東行岡上二里再上嶺一里逾而東則有深峽下嵌惟聞水聲洶湧而不見水從嶺上轉而南行東瞰東界山麓石崖懸削時突於松梢箒影中而不知西界所行之下其崖更聳也南行一里始沿崖南下又一里仰見路

遊記 滇一
西之峰亦變而爲穹崖峭壁極危峻之勢焉從此瞰東崖之下江流轉曲西南破壁去隔江有茅兩三點倚崖而居乃東向拾級直下一里瞰江甚近而猶未至也轉而北始見西崖矗立挿天與東崖隔江對峙其崖乃上下二層向行其上止見上崖而不得下見亦不得下達故必迂而南乃得拾級云北經轟崖下半里下瀕江流則破崖急湧勢若萬馬之奔馳蓋當暴漲時也其水發源於師宗西南龍擴北合陸涼諸水爲蛇場河山龍甸及羅平舊州乃東北至伊澤過東龍山後轉東南抵此卽西南入峽又二百里而會入達盤江者也羅平普安以此江爲界亦遂爲滇東黔西分界焉有舟在江東

頻呼之莫爲出渡者薄暮雨止始有一人出曰江漲難渡須多人操舟乃可不過乘急爲索錢計耳又久之始以五人划舟來復不近涯以一人涉水而上索錢盈壑乃以舟受已昏黑矣雨復淋漓截流東渡登涯入旅店店主人他出其妻黠而惡見渡舟者乘急取盈亦尤而效之先索錢而後授餐餐又惡而鮮且媠褻余蓋與諸少狎而笑余之老也此婦奸腸毒手必是馮文所所記地羊寨中一流人幸余老不爲所中耳 江底寨乃獼獼止此一家歇客爲漢人其人皆不良如獼獼之要渡漢婦之索客俱南中諸彝境所無者其地爲步雄屬乃普安十二營長官所轄也土酋龍姓據土人曰今爲

遊記 滇一
儂姓者所奪步雄之界東抵黃草壩二十里西抵此江六十里南抵河格爲廣南界一百餘里北至本司十二營界亦不下三四十里亦平原中一小邑也

二十五日其婦平明始覓炊遲遲得餐雨時作時止出門卽東上嶺蓋其江自北而南兩崖夾壁惟此西崖有一線可下東崖有片隙可廬其南有山橫列江折而西向入峽有小水自東峽來注故西崖之南江勒而無餘地東崖之南曲轉而存小陞乃知步雄之地西南隨此江其界更遠南抵廣南其界卽盤江此統志所云東入普安州境也

步雄屬貴州普安州

盤旋東北共三

里逾嶺頭遂與南山成南北兩界峽中深逼自東而

西路循北山嶺南行自西而東又五里則北山忽斷如中剖者下陷如深坑底有細流沿石底自北而瀉於南峽路乃轉北而下厯懸石披仄愕下抵石底踐流稍南復攀石隙上躋東崖由石底北望斷崖中剖對夾如一綫並起各千仞叢翠披雲飛流濺沫真幽險之極觀逼仄之異境也旣上復循北嶺東行五里稍降行塢中二里於是路南復有峰突起不沿南塢忽穿北岫矣時零雨間作路無行人旣而風馳雨驟山深路僻兩人者勃窣其間覺樹影溪聲俱有靈幻之氣又二里度東脊稍轉而南復逾岡而上二里一岐東南一岐直北顧奴前馳從東南者穿山腋間二里忽見數十家倚北塢間

遊記 滇一
余覺有異趨問之則大路尚在北大山後此乃山中別聚皆
獼猴也見人佞佞間有解語者問其名曰坡頭甸問去黃草
壩曰尙五十里問北出大路若干里曰不一里蓋其後有大
山北列最高抱此甸而南若隔絕人境者隨其指逾嶺之西
北腋果一里而得大道遂從之緣大山之北而上直躋者一
里望北塢甚深而闢羶開樹杪每竝視之惟見其中叢茅盤
谷闌無片塍半椽也盤大山之東又上半里忽見有峽東墜
稍東南降半里平行大山東南支又見其西復有峽南墜已
與大山東西隔隴矣於是降陟嶺塢十里有兩三家居北岡
之上是曰柳樹止而炊湯以飯而雨勢不止訊去黃草壩不

及遂留止焉其人皆漢語非獼猴居停之老陳姓甚貧而能
重客一見輒煨槽枘以燎濕衣余浣汚而炙之雖食無鹽卧
無草甚樂也

二十六日平明起炊飯風霾飄雨余仍就火久之乃行降坡
循塢其塢猶西下者東三里塢窮有小水自北塢來橫渡之
復東上坡宛轉嶺岫五里有塢在北坡下由其東又五里逾
岡而下塢忽東西大開其西南岡脊甚平而東北若深墜南
北皆巨山而南山勢尤崇黑霧間時露巖巖氣色塢中無巨
流亦無田塍居人一望皆深茅充塞路本正東去有岐南向
崇山之腋顧奴前馳從之一里南竟塢將陟山坡上余覺其

悞復返轍而北從大路東行披茅履濕三里東竟塢有降中
峙塢東塢從東北墜而下路從東南陟而上二里南穿山腋
又東半里逾其東岫俯見東山南向列下界爲峽其中泉聲
轟轟想爲南流者從嶺上轉南半里逾其南岫又俯見西山
南向列下界爲峽其中泉聲轟轟想亦南流者蓋其東西皆
有層巒夾谷而是山中懸其間遂從其西沿嶺南下二里有
小水自東崖橫注西谷遂踞其上濯足而飯既飯從塢上南
行隔塢見西峰高柯叢蔓蒙密無纖隙南二里塢將盡聞伐
木聲則掄材取薪者從其南漸北焉又南一里下至塢中則
塢乃度脊雖不甚中高而北面反下脊南峽南下甚逼中滿

田禾透峽而出遂盤一壑豐禾成塍有小水自東北峽下注
南有尖峰中突水從其西南墜去路從其東北逾嶺一里半
涉壑一里半登嶺又東俯有峽南下其中水聲甚急拾級直
下一里抵塢底東峽水西南注遂橫涉之稍南又東峽一水
自東而西注復橫涉之二水遂合流南行路隨澗東而南二
里出峽有巨石峰突立東南水從塢中直南去塢中田塍鱗
次黃雲被隴西瞻步雄止隔一嶺路從塢東上嶺轉突峰之
南一里有數家倚北岡上是曰沙澗邨始知前所出塢爲沙
澗也由其前東下而復上又東南逾一岡而下共一里餘有
溪自北而南較前諸流爲大其上有石梁跨之過梁復東上

坡一里岡頭石齒縈泥滑湍廉利備諸艱楚一里東下又東南轉逾一岡一里透峽出始見東小山南懸塢中其上室廬纍纍是為黃草壩乃東行田塍間一里遂經塢而東有水自北塢來石坡橫截之坡東隙則疊石齊坡水冒其上南瀉而下其水小於西石梁之水然皆自北而南抵巴吉而入盤江者也自沙澗至此諸水俱清澈可愛非復潢污渾濁之比豈滇黔分界而水即殊狀耶此處有石瀨而復發堰以補其缺東上即為黃草壩營聚壩之得名豈以此耶時樵者俱浣濯壩上亦就濯之汚衣垢膝為之頓易乃東上坡循堵垣而東有街橫縈岡南然皆草房卑舍不甚整闢

土人言前年為步雄龍土司挾其賊

沙土司兵攻毀故非復舊觀然龍氏又為農氏所攻而代之矣其北峰頂即土司黃氏之居

在焉乃又息於吳氏吳漢入男婦俱重客蔬醴俱備云

二十七日晨起雨猶不止既而霽泥湍猶甚姑少憩一日詢盤江曲折為明日行計乃匡坐作記薄暮復雨中夜彌甚衣被俱沾透焉

二十八日晨雨不止衣濕難行俟炙衣而起終日雨涔涔也是日此處馬場人集頗盛市中無他異物惟黃蠟與細笋為多乃煨筍煮肉竟日守雨 黃草壩土司黃姓加都司銜乃普安十二營長官司之屬十二營以歸順為首而錢賦之數則推黃草壩土地之遠則推步雄焉 黃草壩東十五里為馬鼻

河又東五十里抵龍光乃廣西右江分界西二十里為步雄
 又西五十里抵江底乃雲南羅平州分界南三十里為安障
 又南四十里抵巴吉乃雲南廣南府分界北三十里為豐塘
 又北二十里抵碧洞乃雲南亦佐縣分界東西南三面與兩
 異省錯壤北去普安二百二十里其地田塍中闊道路四達
 人民頗集可建一縣而土司恐奪其權州官恐分其利莫為
 舉者 黃草壩東南由龍光箐口者恐板屯壩樓以上俱安隆土司地
其土官自天啟初為部人所殺泗城以孫代署之 八蠟者香俱泗城州地 下田州乃昔年
 大道自安隆無土官泗城代署廣南以兵爭之據其大半道
 路不通實由於此 按盤江自入達與羅平分界 巴澤河格巴吉

興隆那貢

以上俱安隆土司地今俱為廣南有

抵壩樓遂下八蠟者香又有一

水自東北來合土人以為即安南衛北盤江恐非是安南北
 盤合膽寒羅運白水河之流已東南下都泥由泗城東北界
 經那地永順出羅木渡下遷江則此東北來之水自是泗城
 西北界山等所出其非北盤可知也於是遂為右江再下又
 有廣南富州之水自者格亦安隆土司屬今為廣南據者 葛閭慝裏俱泗城州地
 來合而下田州此水即志所稱南旺諸溪也二水一出泗城
 西北一出廣南之東皆右江之支而非右江之源其源惟南
 盤足以當之膽寒羅運出於白水河乃都泥江之支而非都
 泥江之源其源惟北盤足以當之各不相紊也 按雲南批

廣西間道有三一在臨安府之東由阿迷州維摩州

本州昔置乾溝

倒馬坡石天井阿九抹甲等哨東通廣南每哨撥陸涼衛百

戶一員軍兵十五名民兵十五名把守後州治湮沒哨悉廢

弛見有府志可考抵廣南富州入廣西歸順下雷而出馱伏下南寧

此余初從左江取道至歸順而卒阻於交彝者也是為南路

一在平越府之南由獨山州豐寧上下司入廣西南丹河池

州出慶遠此余後從羅木渡取道而入黔滇者也是為北路

一在普安之南羅平之東由黃草壩即此安隆壩樓之下田

州出南甯者余初徘徊於田州界上人皆以為不可行而久

候無同侶竟不得行者也是為中路中路為南盤入粵出黔

之交南路為南盤縈滇之始與下粵之末北路為北盤經黔

環粵之會然此三路今皆阻塞南阻於阿迷之普富州之李

沈見廣西小紀歸順之交彝中阻於廣南之蠶食田州之狂狷北

阻於下司之草竊入寨之伏莽既宦轍之不敢入亦商旅之

莫能從惟東路由沅靖而越沙泥□□□恐州為今人所

趨然懷遠沙泥亦多黎人之恐且迂陟湖南又多歷一省矣

黃草壩東一百五十里為安籠所又東為新城所皆南與

粵西之安隆泗城接壤然在黔曰籠在粵曰隆一音而各異

字一處而各異名何也豈兩名本同一字傳寫之異耶按安

莊之東大路所經亦有安籠箐山與安籠所相距四百里乃

遠者同而近者異又何耶大抵黔中多用籠字粵中多用隆

字如隆安故各從其地而不知其地之相近其取名必非二
縣之類也 黃草壩著名黔西而居聚鬪鬪俱不及羅平州羅平著
名迤東而居聚鬪鬪又不及廣西府此府州營堡之異也聞
澂江府湖山最勝而居聚鬪鬪亦讓廣西府臨安府為滇中
首郡而今為普氏所殘凋敝未復人民雖多居聚雖遠而光
景止與廣西府同也 迤東之縣通海為最盛迤東之州石
屏為最盛迤東之堡聚寶秀為最盛皆以免於普禍也縣以
江川為最澗州以師宗為最敝堡聚以南莊諸處為最慘皆
為普所蹂躪也若步雄之龍儂爭代黃草壩之被闕於龍沙
沙乃步雄龍 安隆土司之紛爭於岑儂
岑為廣西泗城儂為廣南府今廣南勢大

安隆之地為 土司糜爛人民乃其本性而紊及朝廷之封疆
占去八九矣 不可長也 諸彛種之苦於土司糜爛真是痛心疾首第勢
為所壓生死惟命耳非真有戀主思舊之心牢不可破也其
所以樂於反側者不過是遺孽煽動其人不習漢語而素昵
彝風故勾引為易而遺孽亦非果有殷之頑田橫之客也第
跳梁伏莽之奸藉口愚眾以行其狡猾耳 所度諸山之險
遠以羅平師宗界偏頭哨為最其次則通海之建通關其險
峻雖同而無此荒寂再次則阿迷之中道嶺沈家其深杳雖
同而無此崇隘又次則步雄之江底東嶺其曲折雖同而無
此逼削若溪渡之險莫如江底崖削九天塹嵌九地盤江朋

遊滇一
圍之渡皆莫及焉 粵西之山有純石者有間石者各自分
行獨挺不相混雜滇南之山皆土峰繚繞間有綴石亦十不
一二故環窪爲多黔南之山則界于二者之間獨以逼聳見
奇滇山惟多土故多壅流成海而流多渾濁惟撫仙湖最清粵山惟
石故多穿穴之流而水悉澄清而黔流亦界於二者之間
二十九日晨雨霏霏既飯辭主人行從街東南出半里遶東
峯之南而北入其塢並而迴睇始見其前大塢開於南羣山
叢突小石峯或朝或拱參立前塢中而遙望塢外南山橫亘
最雄猶半與雲氣相氤氳此卽巴吉之東障盤江而南趨者
也塢中復四面開塢西則沙澗所從來之道東則馬鼻河所

從出而峽之南則東西諸水所下巴吉之區北則今所入豐
塘之路也計其地北與□□爲對南與富州爲對西與楊
林爲對東與安籠所爲對其遙對者直東則粵西之慶遠直
北則四川有重慶矣入北塢又半里其西峰盤崖削石巖巖
獨異其中有小水南來溯之北又二里循東峰北上逾脊稍
降陟塢復上始見東塢焉其二里再上北坳轉而西坳中有
水自西來出坳下墜東塢坳上豐禾被隴透之而西沿北嶺
上西向行二里稍降陟北塢一里復西北上二里逾北坳從
嶺脊西北行塗中忽雨忽霽大抵雨多于日也稍降復盤陟
其西北坡岡左右時有大窪旋峽共五里逾西坳而下又三

遊記滇一
里抵塢中聞水聲淙淙然四山迴合方疑水從何出又西北
一里忽見塢中有坑中墜如井此水而出入者矣從塢右半
里又西北陟嶺半里透脊爽而出於是稍降從長峽中行西
北三里復稍上始知此峽亦中窪而無下洩之道者也飯於
路旁石上出嶺之西始見西塢中盤內皆嘉禾芄芄北有小
山縮塢口廬舍懸其上是曰豐塘東西南皆迴峰環之水從
西南二塢交注其間北向墜峽由塢東南降嶺循塢南盤南
山北麓其二里北與縮口廬舍隔塢相對見路旁有岐南向
入山疑爲分岐之處過而復還始登見其內道頗大以爲是
再上路分爲二西者旣漸小南者又盤南山又疑爲非往復

數四莫可從問而塢北居廬相距二里餘往返旣遙見南山
有牧者急趨就之而隔峰間壑不能卽至急有負木三人從
前嶺下問之乃知其非隨之二里北出大路其人言分岐之
處尙在嶺西此處南岐乃南塢小路之入山者大路在西塢
入也然此去已不及黃泥河正可從碧峒托宿矣乃西向入
塢有小水自西來路逾坡西上下而復陟三里逾坳坳不高
而接兩山之間爲南山過北之脊東水下豐塘西水復西北
流俱入馬鼻者脊西遙開塢直去循北嶺又西二里岐始兩
分沿北嶺西向出塢爲普安州道橫度塢南陟嶺南上爲亦
佐道遂南度塢路漸微深茅覆水曲磴欹坡無非行潦緣之

遊記 卷一
南上坡一里西南盤嶺角始望見北界遙山橫亘蜿蜒天末
此卽亦字孔西南東轉之脊從丹霞山東南迤邐環狗場歸
順二營以走安籠所北界普安南北板橋諸水入北盤南界
黃草壩馬鼻河諸水入南盤者也又西南入峽一里餘復南
躋嶺巔一里得石磴由脊南轉其脊茅深路曲非此石道復
疑其悞矣循磴西下復轉而南曲折一里抵山麓其麓復開
大塢西去塢雖大皆荒茅盤錯絕無禾塍人煙於是隨山麓
西行三里塢直西去路西南截塢行塢南北界巨嶺森削中
環一壑圓匝合沓令人有四面芙蓉之想惟暝色欲合山雨
復來而路絕茅深不知人煙何處不勝惴惴又西南一里穿

峽脊而過其脊中平而夾甚逼出其西長峽西去南北兩界
夾之甚遙其中一望荒茅而路復若斷若續上則重茅偃雨
下則停潦盈蹊時昏黑逼人惟向暗中躑躅三里忽聞犬聲
繼聞人語在路南計已出峽口然已不辨爲峽爲坡亦不辨
南向從何入又半里大道似從西北而人聲在南從莽中橫
赴之遂陷棘刺中久之又半里乃得石徑入寨門則門閉久
矣聽其春聲甚遙號呼之有應者久之有詢者又久之見有
火影出又久之聞啟內隘門聲始得啟外門入卽隨火入春
者家炊粥浣足雖擁青茅而卧猶幸得其所矣既定問其地
名卽碧峒也爲亦佐東北界問紅板橋何在卽在此北峰之

麓為黃草壩西界與此蓋南北隔一塢云

裔孫 熙海南校字

遊記第五册下

江陰徐宏祖霞客著 子 寄介立 輯

同邑 季夢良會明編 後學吳 櫛傅調 重校

楊名時凝齋閱 族孫徐 鎮筠峪

滇遊日記三

戊寅九月初一日雨達旦不休起觀兩界山已出峽口碧峒在西南山下

其北山岡上即紅板橋為貴州界復去黔而入滇高枕一宵矣就火炊飯欲行主人言此去黃泥河二十里水漲舟莫能渡須少霽之蓋是河東岸無居廬先有去者亦俱反候於此余見雨勢不止憚于往返乃掃剔片地拭木板為几匡坐敝茅中冷則與爨

婦同就濕焰蓋一茅之中東半畜馬西半則主人之榻榻前就地煨濕薪以爲爨爨北即所置几地也與其榻相隔止一火夜則鋪茅以卧日則傍火隱几雨雖時止簷低外濫不能一舉首辨羣山也

初二日夜雨仍達旦主人言今日漲愈甚舟益難渡明日爲街子貴州爲場雲南爲街子廣西爲墟候渡者多彼舟不得不至即余亦同行也余不得已復從之匡坐如昨日就火煨粥日三啜焉枯腸爲潤是日當午雨稍止忽聞西嶺喊聲寨中長幼俱遙應而馳詢之則豺狼來負羊也幸救者傷而未死夫日中而竟獸當道余夜行叢薄中而僥倖無恐能忘高天厚地之靈祐

哉 碧峒在亦佐縣東百里蓋滇南勝境之界山南走東轉

包明月所之南橫過爲火燒鋪南山按滇南勝境乃分界山也而老脊尚在其東火

燒鋪西嶺余前過明月所即平曩所詢土人言其水南下亦佐則明月所東火燒鋪西乃爲分水之脊即轉爲火燒亦資孔之南山東走而北轉經樂民所北達歸順狗場之間而東南下安籠所入廣西泗州城州境又東過思恩府北東時爲大明山而盡于潯州爲黔鬱二江之界其滇南勝境之南所度火燒鋪南山者其峽中尚有明月水出焉界從其口東度兩分老脊從此分爲兩支正支東由亦資孔南東北遶樂民而巳

所北而轉安籠所下泗州城州旁一支南下東轉而黔滇之界因之南抵此峒又南至於江底又南盡於南盤之北焉是黔界越老脊之西南不以老脊爲界而以南支爲界也若以老脊則樂民所狗場營黃草壩俱當屬滇以老脊東行而黔隘小故哀滇益黔以補不足碧峒北與新興城

遙對南與柳樹遙對此地又滇凸而東者 碧峒寨有民哨
有獼猴共居一寨門之內其西爲民寨卽余所棲者其東爲
獼猴寨 自黃草壩至此米價最賤一升止三四文而已
初三日子夜寒甚味爽起雨仍霏霏既飯出寨門路當從小
岐南上山悞西從大石徑行初有塢西北去以爲狗場道隨
石徑西南轉二里東界石山南去塢轉而西隨之二里峽中
禾遂盈隴望北山崖畔有四五家懸坡上相去尙一里而塢
南遂絕乃莽蒼橫陟其塢而西北一里抵北山邨麓有兩人
耕於其下亟趨而問之尙隔一小溪其人輒牽牛避去余爲
停趾遂告以問道意其人始指曰往黃泥河應從來處此悞

矣再問以悞在何處其人不告去乃返行泥墜間路條斷條
續二里餘至前轉塢處猶疑以爲南從南峽入方惆悵無路
忽見塢邊一牧馬者呼之卽碧峒居停主人也問何以至此
蓋黃泥河之道卽從碧峒後東南逾嶺乃轉西峽正與此峽
東界石山南北相隔但茅塞無路故必由碧峒始得通行遂
復二里餘返至碧峒西南傍其寨門東南逾嶺而下一里東
南徑塢半里復上又半里又東南逾一嶺有峽自南西墜而
路則直西出塢半里始下又半里抵西峽中遂由峽西行屢
陟岡窪三里有石峰踞峽之中爲當關之標由其北逾脊而
下時密雲釀雨見細箐縈崖深杳叵測眞豺虎之窟也惴惴

西下一里度壑又二里忽有水自北峽出下嵌壑中遶東南而注是爲黃泥河其河僅比瀘江水不濶而深不渾而急其源發於樂民所明月所經狗場至此東南與蛇場河同下江底而入盤江者也時有小舟艤西稍待之得渡遂西上坡一里半逾嶺均有岐自東南峽底來爲入小寨而抵板橋者乃知板橋亦四達之區也又西出峽見羣峰中圍一壑而北峰獨稍開卽黃泥河所環其一里餘抵聚落中是日爲市時已散將盡入肆覓飯主人婦以地溼天雨勸留莫前問馬場尙四十里度不能前遂停杖焉黃泥河聚廬頗盛但皆草房其地四面環山而北卽河繞其後復東南帶之西又一小溪

自西南峽來北注黃泥其中多盤塢環流上膏豐沃爲一方之冠亦佐之米俱自此馬駝肩負而去前擬移縣於此至今稱爲新縣而名亦佐爲舊縣云

初四日晨起雨止四山雲氣勃勃飯而行西半里度一木橋其下溪流自南而北卽西小溪也又西上坡轉而南溯流半里入西峽又半里轉而北其處又有北峽西峽二流之交焉於是隨北峽溪又溯流半里乃西上山時東峰雲氣稍開乃賈勇上躋仰見西嶺最高其上皆夾坡削箐雲氣罩其頂不能悉上躋二里漸入濃霧中遂從峰頭穿峽上於是箐深霾黑咫尺俱不可見西一里陟其頂平行嶺上又二里乃下下

遊記 滇二十一
一里及西塢涉塢而西一里度一小橋橋下水北流乃南向
西轉一里有岐交其南北南乃入牛場邨道有小峰駢立邨
隱其下焉北乃其處趨狗場營者又西半里乃西上山其坡
峻且滑無石級可循有泥坎陷足升躋極難二里陟峰頭又
平行峰頭一里越其巔時濃霧成雨深茅交道四顧皆瀾淪
如銀海得峯頭一樹如擎蓋下有列石如錯屏乃就樹踞石
而憩止聞颼颼滴瀝之聲而目睫茫如也又西北平行者一
里下眺嶺西深墜而下而杳不可見嶺東屏峙而上而出沒
無常已從北下始有石磴陡墜箐木叢水共一里半陟塢而
西亦中窪之宕也半里又逾西坳出其壑大開路乃稍平尖

峰旁立若爲讓道者西向平行塢中一里半有水橫瀦於前
以爲溪也涉之不流乃壑底中窪之坑畜而成溪者又西二
里復有一溪北流甚急波漲水深涉之沒股焉又西一里乃
飯於峽坡之下既飯遂西入竹峽崇峰廻合紆夾高下深篁
密箐蒙密不容旁入抵中通一路石徑逶迤如披重雲而穿
密幃也其竹大可爲管瀾漫山谷杳不可窮從來所入竹徑
無此深密者其處名竹園箐自黃泥河西抵馬場人人稱其
負家家獻客皆此物也客但出鹽淪之耳其
中坡陀屢更三里逾峽南下其壑中聞又爲霧障止聞隔坡
人語聲然不辨其山形谷勢矣南行壑中一里轉而西半里
又越一坳又半里經峽而西抵危坡下復西向躋磴上於是

遊記 滇二
密箐仍縈夾壁懸崖間其陡削雖殊而深杳一如前也攀陟
三里西逾嶺頭竹箐既盡循山南轉皆從嶺上行路東則屏
峙而上路西則深墜而下然皆沉霧所翳不能窮晰也南向
平陟嶺上者三里轉而西行嶺脊者一里其脊南北俱深墜
而下第霧漫莫悉端倪既而傍北嶺行北屏峙而南深墜又
二里雨復大至適得羊場堡四五家當嶺頭遂入宿焉其家
竹牀竹戶煨煖餉筍竟忘風雨之苦也

初五日夜雨達旦不休飯而行遂南向稍下已漸轉西兩旁
多中窪下陷之穴或深墜無底或瀦水成塘或枯底叢箐不
一而足然路猶時時陟岡逾嶺下少上多也十里見路北有

深箐有岐從箐中升合併西去有聚落當嶺頭是曰水槽其
處聚落頗盛夾道成衢乃狗場營安籠所桃花大道所出但
岡頭無田其上皆耕厓鋤隴穡堪種粟想稻畦在深坑中霧
翳不見也升陟嶺頭又西五里是曰水井其聚落與水槽同
由其西一里半始厓磴下遙望西塢甚深下箐中一里由峽
底西行二里復逾坡而上一里稍下坡西塢中其中不深而
迴峰四闕霧倏開合日色山光遠近迭換亦山中幻景也既
復西向逾嶺三里見嶺西窪中有水成塘乃循峰西北行稍
下一里而入亦佐縣東門縣城磚甃而城外草舍三四家城
中亦皆草舍求瓦房寥寥也一里炊於縣前飯後半里出西

遊滇二
門乃西北行計其地猶在羣峰之頂但四山霧塞上下莫辨
耳從嶺頭西北行二里乃西向厯峻級而下其時霧影亦開
遂見西塢中懸東界所下之山與西界崇峰並夾南北中闢
深壑而拐澤河自北而南經其中焉其形勢雖見而河流猶
深嵌不可窺西山崇列如屏南額尤高雲氣尚平抹其頂不
令盡露西山之南復起一山斜障而東此則障拐澤而東南
合蛇場者也於是盤折西下三里抵坡而磴盡復西北行坡
陀間一里逾岡再下數家茅舍在焉然猶未瀕河流也又西
半里涉一東來小水乃抵河岸溯之北又涉一東北來小水
約半里有渡舟當崩崖下渡之是河發源於平彝衛及白水

鋪以東滇南勝境以西皆注焉其勢半於江底而兩倍於黃
泥河急流傾洞南奔東轉與蛇場合而東南會黃泥河水而
爲江底河者也亦佐羅平南北東西二處俱以此爲界西登
崖崖岸崩頽攀躋而上遂西向陟嶺時暮色將至始以爲旣
渡卽有托宿處而荒崖峻坂絕無一人登陟不已暮雨復來
五里遇一人趨渡甚急執而問之曰此無托宿處鷄場雖遙
亟趨猶可及也乃冒雨竭蹶轉向西南上五里逾坳而西乃
西轉北行峽中稍降二里得數家之聚焉亟投煨燠暮色已
合而雨復徹夜

初六日晨起雨止四山猶氤氳不出旣飯稍西下渡窪復西

遊記 卷二
北上漸露昨所望屏列崇峰在西南而路盤其東北三里逾一岡坪間有墟地一方則雞場是也從坳北稍下又得數家之聚焉問之亦雞場也蓋昨所宿者爲雞場東邨此則雞場西邨矣從邨北行其峽西墜處有石峰岫立路從其北逾脊稍東轉而北涉塢共三里遂西北躋嶺折盤石磴西北上二里而涉其巔則夙霧頓開日影煥發東瞻羣峰吐穎衆壑盤空皆昨所從冥漠中度之者越嶺西下一里抵盤壑中見秋花懸隙細流縈磴遂成一幽異之境西一里有山橫披壑西透其西北腋似有耕雲樵石之棲在西峯後循其東南塢則大路所從去也乃隨塢南轉塢東西山分兩界余以爲塢中

水將南流而不意亦俱中窪之穴也南行三里復逾脊而上遂西轉盤橫城之南脊焉一里循橫城南崖而西其處山脊湊合岡峽縱橫而森石尤多娟麗又西一里有岐自東南峽來合又西一里乃轉北下於是西向山遙豁而路則循山西北向行矣四里復北向逾岡轉而西下望西北塢中有石壁下嵌不辨其底已而降行塢中一里餘又直造其下則亦中窪之峽也由其南又西行兩陲岡塢共三里始涉一南流小水自渡拐澤河至此俱行嶺上未見勺水又西逾一岡一里南望岡南一峰西關洞門高懸門有木橫列而下隔一峽遙睇無路遂不及迂入又半里又涉一南流小水西逾一岡共二里而抵桃源邨

其邨百家之聚與水槽相似倚北山而居前有深塢羅平之道自塢中東南來北東西三面俱會其水南墜入崖洞而南洩於蛇場江故知拐澤西岸崇山猶非南行大脊也邨多木皮覆屋以代茅時日已午就邨舍滌湯餐飯而木濕難燃久之乃西向行渡西北峽石中小水一里陟西塢而上又一里逾岡而西見西塢自西而東其南有小山蜿蜒亦自西而東界之其山時露石骨崢嶸然猶未見谿流也塢中雖旋窪成塘或滙澄流或瀦濁水皆似止而不行者又西一里逾岡西下有邨當塢倚南崖而居於是繞邨始行始見塢中溪形曲折且聞溪聲潺湲矣由其北溯之西行又一里見塢中又有

一邨當塢而居始見溪水自西來從其邨西環其邨北又遶其東其邨中懸其北曲中一溪而三面環之南倚南山之崖北置木橋以渡溪水其水不甚大而清徹不汨是爲清水溝云蓋發源於西山之迴坎坡經此而東出於桃源始南去者也又西一里復過一邨其邨始在塢北又西一里又經一邨曰小板邨有稅司在焉蓋羅平北境爲桃花駝鹽之間道也又西二里始逾坡涉澗屢有小水自北峽來南注於清水溝路截而逾之也北峽中男婦二十餘人各捆負竹筍而出蓋土人羣入箐採歸淡熏爲乾以待鬻人者又西二里直逼西山之麓有邨倚之是爲廻窅坡清水溝中民居峽塢至此而

遊記 滇二
止以塢中有水可耕也由此西南半里過一小橋其水自西
北沿山而來卽清水溝上流之源矣度之卽西上嶺嶺頭有
索哨者不之與而過躡嶺一里半西陟嶺脊是脊始爲分水
之處乃北自白水鋪西直南度此迴環西南而峙爲大龜以
分十八寨永安哨江底河諸派者也而羅平之界亦至是而
止焉逾脊西漸西北平下一里漸轉而西行塢中其塢東西
直亘而南北兩界遙夾之南山卑伏而北山高聳暮霧復勃
勃籠北峰上流泉亦屢屢自北注南第南山之麓似有墜澗
橫其北然不辨其爲東爲西以意度之以爲必西流矣然不
可見也塢中皆荒茅斷隴寂無人烟西行六里其西有山橫

列塢口塢始墜而西下茅舍兩二家依塢而棲路乃逾塢循
北山而西半里有茅亭一龕當路旁南與茅舍對想亦哨守
之處也又西一里稍下有小水成溪自北峽來小石梁跨之
其水南注塢口而去旣度梁卽隨西山南向隨流半里轉而
西上嶺暮色合矣又上一里而馬場之聚當嶺頭所投宿者
乃新至之家百無一具時日已暮不暇他徙煨濕薪卧濕草
暗中就枕而已

初七日晨起雲尙氤氳飯而行有索哨者還宿處解囊示批
而去於是西北隨坡平下其路甚坦而種麻滿坡南蓋其下
亦有塢西通者西馳四里始與溪近隨流稍南半里復循坡

遊記 滇二
西轉又一里下坡西望西南塢中有數家之聚田禾四遶此
溪經塢環之其塢自北山隨坡南下中有一水亦自北而南
與此水同會於邨北合而西南破峽去乃西截北來塢半里
抵北來之溪有新建石梁跨之是爲獨木橋想昔乃獨木今
雖石而猶仍舊名也橋下溪流三倍於西來之水固知北塢
之源遠於東矣逾橋西卽上嶺西南直躋甚峻一里半逾其
脊又西向平下者一里有岐隨岡南去者陸涼道也岡西塢
中復有數家焉亦陸涼屬也其塢亦自北而南雖有邨而無
流路西下截塢半里經又邨北半里抵西界崇山下遂躡峻
而上而陸涼之界又西盡於此矣蓋因其水南下陸涼故西

自此塢東抵廻窻西山皆屬之陸涼其處南抵陸涼衛路經

尖山天生橋相距尙八十里也由西嶺而上又爲海崖屬乃

亦佐縣右縣丞土司龍姓者所轄

亦佐縣有左右二丞皆土司左丞姓沙在本縣卽與

步雄攻黃草壩者右丞姓龍或日卽姓海在此而居近越州其地東自此嶺而西抵箐口

焉東與亦佐西界中隔羅平陸涼二州之地間錯其間不接
壤也從東麓西上屢峻屢平峻者削崖盤磴平者曲折逶迤
三峻而三逾嶺頭共七里望見南坪有數十家之聚北峰則
危聳獨懸蓋自馬場而西卽望見遙峰尖削特出衆峰之上
而不意直逼其下也又一里梯石懸磴西北抵危峰前其時
麗日轉耀碧天如洗衆峰盡出而是山最高不特獨木西峯

遊記 滇二
下伏如砥卽遠而迴窅老脊亦不能上與之抗惟拐澤鷄場
西嶺遙相頡頏其中翡翠層層皆南環西轉而接於西南巨
峰此東顧之極觀也其西則亂峯迴巒叢箐盤錯遠雖莫抗
而近多自障焉其南則支條直走近界旣豁遠巘前環此獨
木諸所遙帶而下洩者西南有二峰遙湊如眉中分此盤江
之所由南注者耶其西卽越州所倚而東峰之外復有一峰
高懸其南浮青上聳圓若團蓋此卽大龜山之特峙於陸涼
路南師宗彌勒四州之交者耶天南諸峯悉其支庶而此峰
又其伯仲行矣由峰西逾脊稍下卽有石坡斜懸平皮砥峙
古木婆娑其上亦高崖所僅見者由此歷級西下一里有壑

迴環中窪四合復有中懸之臺平瞰其中夾坑之岡橫亘其
外石痕木蔭映彩流霞令人神骨俱醒由橫岡西南轉二里
復逾一脊又西度一中懸之岡有索哨者不顧而去度岡而
西一里復上坡又一里西逾其隘復有索哨者亦不顧而去
想皆所云海崖土司者逾脊又不能西見盤江又西半里西
隙始盡下界遙開瞥然見盤江之流自西北注東南而去來
猶不能盡矚焉於是西向拾級直下一里抵塢中又西半里
循西山南轉半里復稍上逾岡西復平行嶺上半里有岐一
直西下坑一西南盤嶺見西南路稍大從之一里得數家當
嶺頭其茅舍低隘牛畜襍處其中皆所謂獯獯也男子皆出

婦人莽不解語索炊具無有應者是卽所謂箐口也海崖之界於是止焉由岡頭西南去爲越州道從此西北下卽越州屬爲曲靖道遂西北下嶺始甚峻一里轉西漸夷於是皆車道平拓無齟齬之慮矣又西一里飯於樹下又西馳七里始有塢北來遂盤東山北轉一里始橫截北來之塢余始意塢中當有流南注而不知其塢亦中窪也塢中橫亘一岡南北俱成盤壑而壑南復有岡焉從中亘者馳而西一里復西上坡又一里陟坡之脊亦有獼獼數家問之道不能對也從脊西下三里連越兩坡又見塢自北來南向去其中皆員窪貯水有岡中間不通流焉從坡上西北望則龍潭之山自北分

突屏列而西此近山也西南望則越州南嶺隔山遙障所謂西峰也而東峰之外浮青直對則大龜之峰正與此南北相準焉西下坡又有一塢自北而南南環爲大塢與東界連窪之塢合此塢始有細流中貫夾塢成畦流上橫小橋西度有一老人持筐賣梨其側一錢得三枚其大如甌味鬆脆而核甚小乃種之絕勝者聞此中有木瓜梨豈卽此耶西上一岡平行岡上四里直抵西峰下則有塢隨其麓而深澗濼之所謂龍塘河也然但見澗形而不能見水乃西下坡約半里隨塢出西南先與一小水遇隨之旣乃截塢而西又半里始與龍塘河遇有大石梁跨其上橋右邨廬纍纍倚西山而居始

遊記 滇三一
皆瓦房非復茅舍矣龍塘河之水發源於東北山峽中其處
環潭甚深爲蛟龍之窟卽所謂曲靖東山之東峽也其山北
自白水鋪西分水嶺分支南下亘曲靖之東故曰東山而由
此視之則爲西嶺焉南至此瀕河而止其西腋之中爲闔木
山東腋之中爲龍潭卽此水之所出矣自箐口西下塢中卽
爲越州屬州境至此西止而田疇悉環聚焉由邨西上坡卽
東山之南盡處也二里逾岡頭方踞石少憩忽一人自西嶺
馳來謂余曰可亟還下山宿前嶺方有盜劫人毋往也已而
其婦後至所語亦然而仰視日方下午前終日馳無人之境
皆豺狼魑魅之窟卽深夜幸免豈此周行東西夾山而居者

甚衆又有當賊道耶因詰之曰既有賊汝何得至其人曰彼
方剽行者衣余夫婦得迂道來耳余疑此人欲誑余還宿故
托爲此言又思果有之今白日返宿將明日又孰保其不至
耶况旣劫人彼必無復待之理不若卽馳而去也遂叱顧僕
行卽從岡上盤北山而西蓋北卽東山南下之頂南卽其山
下墜之峽而盤江自橋頭南下爲越州後橫亘山所勒轉而
東流遂截此山南麓而斷之故下皆硿礮路橫駕嶺上四里
抵其中旁矚北嶺石參差而岫岫峽覺雲影風枝無非憐人
之具令人錯顧不定投趾莫擇又西四里始西南下片石中
其處土傾峽墜崩嵌交錯而石骨露其中如裂瓣綴行其墜

處皆流土不可着足必從石瓣中宛轉取道其石質幻而色異片片皆英山絕品惟是風鶴驚心不能狎憩而徐賞之亡何已下見西塢南流之江知去橋頭不遠可免虎口乃倚石隙少憩竟作青蓮瓣中人矣從石中下者一里既及西麓復行支隴遂多聚廬之居又一里路北江廻堰曲中涵大塘一圍四面豐禾環之東有精廬高倚東山之麓西則江流所洩而石梁橫跨之又行畦間半里始及石梁其梁不高而長是爲南盤之源北自炎方交水曲靖之東直南至此是橋爲曲靖鎖鑰江出此卽東南流遶越州之東而南入峽焉逾梁而西約半里上坡北而宿于逆旅卽昔之所過石堡邨也適夜色已暝明月在地過畏途就安廬樂甚問主人嶺上有禦人

者果有之乎主人曰卽余隣人下午樵於山數賊自山後躍出剝三人衣而碎一人首與君來時相後先也予於是始感前止者宿之情而自媿以私衷臆度之也蓋是嶺東爲越州西爲石堡乃曲靖衛屯軍之界互相推諉盜遂得而乘之耳初八日昧爽飯索酒而酌爲浴泉計遂由邨後越坡西下則溫泉在望矣塢中蒸氣氤氳隨流東下田畦間鬱然四起也半里入圍垣之戶則一泓中貯有亭覆其上兩旁復磚甃兩池夾之北有榭三楹水從其下來中開一孔方徑尺可掬而盥也遂解衣就中池浴初下其熱燥膚較之前浴時覺甚烈

遊記 演二
既而溫調適體殊勝彌勒之太涼而清冽亦過之浴罷由垣後東向半里出大道是日碧天如濯明旭晶然騰翠微而出浩波映其下對之覺塵襟盪滌如在水壺玉鑑中北行十里過南城又二十里入曲靖南門時有戈參戎者奉按君命巡諸城堡高幢大纛擁騎如雲南馳而去余避道旁眎之如赫電亦如浮雲不知兩界青山見慣袒當誰左也飯於麪肆中出東門半里入東山寺是名青龍山而實無山郭東崕樓高僅丈餘大不及五丈上建大殿前列層樓配之置宏鐘焉鐘之大余所未見也殿左有藏經閣其右樓三層皆翼於崕樓之旁而齊其末者徒倚久之出寺右循城而北五里出演武

場大道又三里過白石江又一里過一坡又十里抵新橋殷

雷轟然大雨忽至避茅簷下水霰交作迴風湧之撲人衣面

莫可掩蔽久之乃霽仍北行溼滑不可着趾十里抵交水入

南門由霑益州署前抵東門投舊邸龔起潛家見其門閉異

之叩而知方演劇於內也余以足泥衣垢不樂觀亟入其後

樓而憩焉

霑益惟土司居州治而知州之署則在交水

初九日余倦於行役憩其樓不出作數日遊紀是日爲重九

高風鼓寒以登高之候而獨作袁安僵卧之態以日日躋攀

崇峻不少也下午主人携菊具酌不覺陶然而卧

初十日寒甚終日陰翳止寓中下午復雨徹夜不休

十一日余欲行主人以雨留後爲強駐厭其酒脯焉初余欲從霑益并窮北盤源委至交水龔起潛爲余談之甚晰皆鑿鑿可據遂圖返轅由尋甸趨省城焉

十二日主人情篤候飯而行已上午矣十里仍抵新橋遂由岐湖流西南行二里抵西南山下石幢之水乃從西北峽中來路乃從西南峽中入一里登嶺一里陟其巔西行嶺上者又一里乃下初從嶺頭下瞰西塢有廬有疇有水濼之以爲必自西而東注石幢者迤邐西下者又一里抵塢中則其水返西南流當由南谷中轉東而出於白石江者詢是邨爲戈家冲由是而西併翠峰諸澗之流皆爲自石江上流之源

矣源短流微濼帶不過數里之內而沐西平曲靖之捷誇爲冒霧涉江自上流渡而夾攻之著之青史爲不世勲而不知與坳堂無異也徵事考實書之不足盡信如此於是盤折坂谷四里越劉家坡則翠峰山在望矣蓋此山卽兩旁中界之脊南自宜良分支北度木容箐又北而度火燒箐嶺又北度響水西嶺又北而結爲此山又西夾峙爲迴龍山繞交水之西北經炎方又北抵霑益州南轉東復折而南下峙爲黑山分爲兩支正支由火燒鋪明月所之間南走東折下安籠所入泗城州而東峙爲大明山遂盡於潯州旁支西南由白水而分水嶺又分兩支直南者由迴窰坡西嶺西南峙爲大龜

遊記 滇二
山而盡於盤江南曲西南分支者盡於曲靖東山其東南之
水下爲白石江東北之水下爲石幢河而西則洩於馬龍之
口江而出尋甸爲北盤江焉然則一山而東出爲南盤西出
爲北盤惟此山及炎方足以當之若曲靖東山則旁支錯出
而志之所稱悉悞也由劉家坡西南從坡上行一里追及一
堰乃翠峰山下橫山屯人也隨之又西一里乃下坡徑塢一
里有小水自西北小石梁跨之從此西南上坡爲三車道從
此直西湖小水自西南岸入爲翠峰間道其路若續若斷橫
截塢隴三里有大道自東南來則自曲靖登山之徑也於是
東南望見三車市矣遂從大道西行二里將抵翠峰下復從

小徑西南度隴風雨忽至頃刻而過一里下坡涉深澗又西
上坡半里抵橫山屯其屯皆徐姓老嫗命其子從邨後送余
入山半里抵其麓卽有兩小澗合流涉其北來者溯其西來
者遂躡峻西上一里半盤嶺頭而北轉入西峽中則山之半
矣其山自絕頂垂兩支如環臂東下北支長則繚繞而前爲
新橋西岡之脈南支短卽所躡以上者兩臂之內又中懸一
支當塢若臺之時則朝陽菴踞其上菴東北向其南腋又與
南臂環阿成峽自峰頂逼削而下則護國舊寺倚其間自西
峽入半里先達舊寺然後東轉上朝陽以舊寺前墜峽下塹
也舊寺兩崖壁夾而陰森其病在旁無餘地朝陽孤臺中綴

而軒朗所短在前少廻環余先入舊寺見正殿亦整其後遂
危崖迴峭藤木倒垂於其上而殿前兩柏甚巨夾立參天寺
中止一僧乃寄錫殿中者一見卽爲余爇火炊飯余乃更衣
叩佛卽乘間東登朝陽一頭陀方曳杖出菴門余入其菴亦
別無一僧止有讀書者數人在東樓余閒步前庭庭中有西
番菊兩株其花大如盤簇瓣無心赤光燦爛黃菊爲之奪艷
乃子種而非苗分此其異於諸菊者前樓亦幽迥庭前有佳
花一樹幽香飄泛遠襲山谷余前隔峽盤嶺卽聞而異之以
爲天香遙墜而不意乃敷萼所成也桂芬菊艷念此幽境恨
無一僧可托還飯舊寺卽欲登頂爲行計見炊飯僧懇勤整

餽雖瓶無餘粟豆無餘蔬殊有割指啖客之意心異之及飯
則已箸不沾蔬而止以蔬奉客始知卽爲淡齋師也先是橫
山屯老嫗爲余言山中有一僧損口苦體以供大眾有子衣
者輒復予人有餽食者己不鹽不油惟恐眾口弗適余初至
此訊之師不對余肉眼不知卽師也師號大乘年甫四十幼
爲川人長於姚安寄錫於此已期年矣發願淡齋供眾欲於
此靜修三年百日始一下山其形短小而目有瘋癢之疾苦
行勤修世所未有余見之方不忍去而飯未畢大雨如注其
勢不已師留止宿余遂停憩焉是夜寒甚余宿前楹師獨留
正殿無具無龕徹夜禪那不休

十三日達且雨不止大乘師復留憩余見其瓶粟將盡為炊粥為晨餐師復即另爨為飯上午雨止恐余行復強余餐忽有一頭陀入視即昨朝陽入菴時曳杖而出者見余曰君尚在此何不過我我猶可為君一日供不必噉此也遂挾余過朝陽共煨火具餐師號總持馬龍人為曲靖東山寺住持避囂於此亦非此菴主僧也此菴主僧曰瑞空昨與舊寺主僧俱入郡瑞空歸而舊寺僧并不知返蓋皆蠢蠢世法佛法一無少解者大乘精進而無餘貲總持靜修而能搏節亦空山中兩勝侶也已而自言其先世為姑蘇吳縣籍與余同姓昔年朝海過吳門山塘徐氏欲留之放生池師不果而歸今年

已六十三矣是夜宿其西樓寒更甚而夜雨復潺潺

十四日雨竟日不霽峭寒砭骨惟閉戶向火不能移一步也

翠峰山在曲靖西北交水西南各三十里在馬龍西四十

里秀拔為此中之冠朝陽菴則劉九菴大師所開建者碑言

師名明元本河南太康人會中甲科為待御嘉靖甲子駐錫

翠峰萬曆庚子有征播之役軍門陳用賓過此感師德行為

建此菴後師入涅槃陳軍門命以儒禮葬於菴之東原

土人言劉

侍御出巡案置二桃為鼠所竊劉窺見之伴試門子曰汝何竊桃門子不承嚇之曰此處豈復有他人而汝不承吾將刑之門子懼刑遂妄承之問核何在門子復取他核以自誣劉曰天下事枉者多矣乃棄官薙髮于此

曲靖者本唐之曲州靖州也合其地置府而名亦因之 霑益州土

知州安邊者舊土官安遠之弟兄終而弟及者也與四川烏撒府土官安孝良接壤而復同宗水西安邦彥之叛孝良與之同逆未幾死其長子安奇爵襲烏撒之職次子安奇祿則土舍也軍門謝命霑益安邊往諭水西邦彥拘留之當事者卽命奇祿代署州事并以上聞後水西出安邊奉旨仍掌霑益奇祿不得已還其位而奇祿有烏撒之援安邊勢孤莫助擁虛名而已然邊實忠順而奇祿狡猾能結當道歡今年三月何天衢命把總羅彩以兵助守霑益彩竟乘機殺邊并挈其貲二千金去或曰彩受當道意指皆爲奇祿地也奇祿遂復專州事當道俱翕然從之獨總府沐曰邊雖土司亦世臣

也况受特命豈可殺之而不問故至今九月間霑益復机杼不安爲未定之局云 下午飯後伺雨稍息遂從朝陽右登頂西上半里有瞰峽中夔國寺下嵌窅口左瞻岡上八角菴上踞朝陽後脇西眺絕頂之下護國後箐之上又有一菴前臨危箐後倚峭峰有護國之幽而無其逼有朝陽之塏而無其孤爲此中正地是爲金龍菴時霏雨復來俱當岐而過先上絕頂又西半里逾北嶺望見後數里外復一峰高峙上亦有菴曰盤龍菴與翠峰東西駢峙夾北塢而下卽新橋石幢河之源也於是南向攀嶺脊而登過一虛堂額曰恍入九天又南上共半里而入翠和宮則此山之絕頂也翠峯爲曲靖

遊記 滇二
名峰而不著於統志如閩木之在東山與此隔海子遙對然
東山雖大而非正脉而此峰則爲兩江鼻祖余初見西塢與
迴龍夾北之水猶東下新橋而朝陽護國及是峰東麓之水
又俱注白石疑是峰猶非正脊及登頂而後知正南下墜之
峽則南由響水坳西獨西下馬龍出尋甸矣始信是頂爲三
面水分之界東北二面俱入南盤南面入北盤其脉南自響水坳西平度而
峙爲此峰卽西度盤龍其水遂南北異流南者從西轉北北
者從東轉南兩盤之交錯其源實分於此云 翠和頂高風
峭兩老僧閉門煨火四顧霧幙峰瀾畧瞰大畧由南塢西下
爲尋甸間道余擬明日從之而去者遂東南下由靈官廟東

轉半里入金龍菴菴頗整潔庭中菊數十本披霜含雨幽景
淒絕是菴爲山東老僧天則所建今天則入省主地藏寺而
其徒允哲主之肅客具齋暝雨漸合遂復半里東還朝陽欲
下夔國看大乘師雨滑不能瞰之而過

十五日達旦雨止而雲氣靄鬱余復止不行日當午獻影余
遂乘輿往看大乘大乘復固留時天色忽霽余欲行而度不
及姑期之晚過爲明日蚤行計乃復上頂環眺四圍遠峰俱
出始晰是山之脉但東西橫列而脉從中庭屢伏屢起非直
亘之脊也惟翠峰與盤龍二峰乃東西並夾而翠峯之南響
水岫之支橫列東下而結爲曲靖盤龍之西又南曲一支始

東下而結為交水又橫亘而北始東滙炎方之水又北始轉
度霑益之南塢焉從峯東下又還過八角菴仍返餐於朝陽
為總持所留不得入護國是口以麗江嵩明二處求兆於翠
和靈籤麗江得貴人接引喜更新嵩明得枯木逢春欲放花皆吉兆也午晴後竊計明
日可早行既暮而雨復合

十六日阻雨

十七日雨復達旦念自駐朝陽者數日飯後欲別而行總持
謂雨且復至已而果然已復中霽既乃大注傾盆倒峽更甚
於昨

十八日徹夜徹旦點不少較前二日俱午刻朗然而今即因
爍之影一併無之而寒且更甚惟就楫拙作生涯不復問前
程矣

十九日晦雨仍如昨復阻不行楫揆閒談總持昔以周郡尊
事逮繫柝楊甚苦因筆記之

東山寺昔有藏經乃唐巡撫所請歸者郡守周之相石阡人由鄉薦擢守曲靖以清直聞慕總持師道行請之檢藏延候甚密迤東巡守以下諸僚皆有獨清之恨而周復不免揚其波于是悉側目之中傷于撫臺王伉羅織無跡遂誣師往還為交通賄賂以經麗為筐篋坐以重贓周復代為完之而去云
二十日夜不聞簷溜以為可行矣晨起而霧復以為霽可待也既飯而霧復成雨及午過大霽以為此霽必有久晴迨暮而雨聲復瑟瑟達夜而更甚焉

二十一日晦冥終日迨夜復雨是日下午散步朝陽東數十

步東峽中一菴當峽是曰太平菴蓋與護國東西夾朝陽者
太平老僧煮芋煨栗以餉

二十二日晨起晦冥然決去之念已不可止矣上午乃行總
持復贈之以米恐中途雨後一時無宿者耳既別仍上護國
後夾箐中觀龍潭潭小而流不竭蓋金龍菴下夾壁縫中之
液雖不竭而非涵瀦之窟也遂西上逾嶺循翠和宮之後一
里餘又逾嶺而南下雨猶霏霏不已半里及塢中又一里有
岐北轉悞從之漸入山夾則盤龍所登之道也仍出從大道
西南行二里有邨當塢中溪流自塢直南去路由邨西轉北
行半里涉塢而西一里又有邨在坡間是曰高坡邨由邨後

下岡有岐從塢中西南去爲小徑可南達雞頭邨從岡上西
北轉爲大徑乃駝馬所行者初交水主人謂余有間道自尋
甸出交水甚近但其徑多錯乃近日東川駝銅之騎所出無
同行之旅不可獨去須從響水走雞頭邨大道乃余不趨響
水而登翠峰問道於山僧俱云山後雖卽駝銅道然路錯難
行須仍出鷄頭爲便至是余質之途人亦多主其說然見所
云徑路反大而所云往鷄頭大路者反小甚心惑之曰以邨
人爲卜然已過邨見有邨人自山中負薪來呼而問之則指
從北不從南余乃從駝馬路轉西北循岡三里西北過一脊
其脊乃自盤龍南度者余初以爲分支南下而不意乃正脉

遊記 卷二
之曲出坳西見脊東所上者甚平而脊西則下墜深曲脊南
北又從嶺頭駢峰高聳各極嵯峨意是山之脊又直折而南
蓋前自翠峰度其北去者此又度其南一脊而半日間兩度
之矣從岫西隨南峰之上盤腰曲屈其坑皆深墜北向一里
躋一坡一里又北度一脊其脊平亘於南北之中者於是又
一里再躋北嶺始西北下其時天已漸霽無復晦冥之色遠
峰近峽環矚在望二里下西塢其塢自南而北其中黃雲盤
隴邨落連錯一溪中貫之問水所從出則仍從新橋石幢河
也問其所從來則堰口也問其地何名則兔街子也始信所
過之脊果又曲而南過堰口當又曲而北余前登翠峰第見

其西過盤龍不至此又安知其南由堰口耶前之爲指南者
不曰雞頭卽曰桃源余乃漫隨馬跡再歷龍脊逢原之巽直
左之右之矣下塢南行二里遂橫涉其溪中流湯湯猶倍於
白石江源也南上坡一里是爲堰口聚落數十家在溪北岡
上乃入炊久之飯而行陰雲復合其處有岐北入山爲麥冲
道余乃西向行其溪亦分岐來一自北峽一自西峽余度其
北來者遂西入峽漸上漸峻天色亦漸霽四里從嶺上北轉
則北峽之窮墜處又一里復逾嶺而西是嶺自木容箐楊金
山北走翠峰復自盤龍南走高坡又南至此始轉而北其東
西相距數里之內凡三曲焉余一日三過之何遇之勤而委

曲不遺耶從嶺西涉塢其水遂南流一里於是又北轉逾嶺一里西北下山二里抵塢中隨小水北向出峽始有塢成畦路當從畦隨流西去而塢北有邨聚當北岡上是爲灑家土會之姓或曰亦屬平彝乃一里經塢登岡由灑家西向行一里越隴西下有峽自北來小水從之是亦麥冲南來之道遂循其塢轉而西南行二里抵新屯廬舍夾道豐禾被塢其處爲平彝之屯據土人言自堰口之北兎街子屯屬平彝而糧則寄於南甯自灑家之西抵三車屯屬平彝而糧則寄於馬龍自一碗冲之西抵魯石屯屬平彝而界則屬於尋甸蓋尋甸曲靖以堰口老龍南分之脊爲界馬龍南甯以堰口老龍爲界而平

彝則中錯于兩府之交而爲屯者也自屯西逾坡共一里餘過一塢有二三家在西嶺其塢復自北而南由邨南轉而逾岡西南下二里復有一塢溪疇南環聚落北倚是爲保官兒庄夾路成衢爲邨聚之最盛者此亦平彝屯官之庄也二十三日中夜聞隔戶夜起者言明星痕痕雞鳴起飯仍濃陰也然四山無霧昧爽卽行始由西南涉塢一里漸轉西行入峽平涉而上三里逾一峒脊遂西下兩上兩下兩度南去之塢兩逾南行坡脊而西共五里有邨在西坡上是曰三車由其邨後復逾南行一坡度南行一塢一里半披西峽而入於是峽中水自西而東溯之行半里漸盤崖而上崖南峽中

箐木森鬱微霜乍染標黃疊紫錯翠鋪丹令人恍然置身丹
碧中一里餘漸盤而北折下度盤壑更覺深窈二里又循西
峽上一里又逾一脊是爲南行分脊之最遠者東西皆其旁
錯也由脊西下涉塢再西共二里有峽甚逼隨峽西折而南
行半里復西逾嶺半里出嶺西始見嶺北有塢居廬環踞岡
上是爲一碗冲於是西行嶺脊之上其嶺頗平南北皆塢而
脊橫其中一里陟脊西又南轉逾岡西下共一里度一峽想
卽一碗冲西向洩流之峽也又西北上坡其坡頗長一里陟
其巔於是東望所度諸嶺如屏層遶而直東一峰浮青遠出
恐尚在翠峰之外豈東山闔木之最高處耶北望乃其峰之

分脊處至是乃見廻支環壑而南望則東南最豁此正老脊
分支環於板橋諸處者不知此處何以反伏其脊其外亦有
浮青特出遠甚當是路南市邑之間惟西則本支尙高不容
外矚也由巔南循坡西轉半里又西度脊從脊西向西北下
塢約一里有溪始西向流橫二松渡之其溪從西峽去路循
西北坡上一里復西逾脊環坡南下遂循之行一里轉而西
下有塢自北來頗巨橫涉其西墜泥汚澁半里有大聚落在
西坡下是爲魯石哨其處已屬尋甸而屯者猶平彝軍人也
由邨南西上逾坡一里復逾岡頭轉而西南二里又西向逾
脊從脊西下峽中半里峽北忽下墜成坑路從南崖上行南

遊言滇二
聳危巖北陷崩坑坑中有石幢則崩隕之餘也循坑西下又半里有北來之塢橫度之又半里涉溪西上復西南上坡橫行坡上一里又西向入峽其南有峰尖聳北有峰駢立二里從南峯之北逾腋而西又一里始行北峰之南岡與北峰隔塢相對有邨居倚北峰而懸塢北是爲郭擴始非平曩屯而爲尋甸編戶由其西南下坡半里涉小澗西登坡循坡北行又與駢峯東西隔塢共二里北上瞰駢峰之陰遂西半里逾岡從岡上平行有中窪之坑當岡之南橫墜而西其西有尖峯純石而中突兩腋屬於南北若當關之標路行坑上一里出尖石峰之北腋遂西向而下一里抵西壑則尖石峰之西

麓矣於是南界擴然直望一峰最高遠插天表余疑以爲堯

棧山而無可徵也

迤東諸山惟堯林山最高聳特出在嵩明東二十里與河口隔河相對登楊林老脊

猶東望而見之今則南望而見之皆在七八十里之外按志無堯林之名惟有秀嵩山在嵩明州東二十里聳秀挿霄漢環州之山惟度壑西轉二里越小溪橋有邨在北隴是曰壁此爲最耳

假由其西攀嶺北上旋逾嶠而西一里復下涉壑又南見天表高峰時已追及一老人執而問之果堯林也又西一里復入西峽躡峽而上半里逾嶺西西界遙山始大開望見南龍老脊自西南橫列而東北則東川尋甸倚之爲界者也其脊平峙天際而西南與東北兩頭各起崇峰其勢最雄亦最遠從屏峙中又分列一支自西北走東南若八字然其交分之

處山勢獨伏而尋甸郡城正托其胸中由伏處入爲東川道西分分列之脊爲嵩明并入省道循分列東麓而南爲馬龍道楊林之水遶堯林之東馬龍水由中和北轉同趨而北皆隨此分列之山而合於其東者也但溪流猶不可見而郡南海子則汪然可挹從此西下坡峻嶺豁二里抵其峽中有小水亦南行隨之西南又半里北塢廻環中有邨廬富坡曰海桐由其南西度塢復上岡一里抵岡頭隨岡南下轉而西共二里塢自北來溪流隨之內有邨當塢曰果壁外有石堰截流路由堰上涉水而西從平坡上行二里稍下有邨倚坡之西曰柳塘於是坡盡畦連北抵廻峰西逾江而及郡南接海

子皆禾稻之區而邨落相望矣從畦塍西行二里則馬龍之溪自東南峽出楊林之溪自西南峽出夾流而北至此而合石梁七洞橫架其上曰七星橋其自南而北爲北盤上流正與石堡橋之流自北而南爲南盤上流勢正相等但未能及曲江橋之大也過橋有廟三楹東向臨之中有舊碑或言去郡城十五里或言二十里或名爲江外河或名爲三岔河無定里亦無定名而一統志又名其溪爲阿交合溪又注舊名爲些邱溢派江名其橋爲通靖橋然注其橋曰城東二十里跨交合溪注其溪曰府東南十五里合流又自異焉按舊城在今城東五里今城築於嘉靖丁亥安銓亂後則今以十五

里之說爲是乃屢訊土人皆謂其流出東川下馬湖無有知其自霑益下盤江者然一統志曰入霑益後考之府志其注與一統同叅之龔起潛之說確而有據不若土人之臆度也或有謂自車洪江下馬湖其說益訛亦可見此水之必下車洪車洪之必非馬湖矣蓋車洪之去交水不遠起潛之諧霑益甚真若車洪之上不折而西趨馬湖則車洪之下不折而北出三板橋則起潛之指示可知也由江西岸北行半里隨江折而西循江南岸依山陟嶺又二里餘江折而北路逾嶺頭折而南下半里由塢中西行於是循鳳梧南山之麓矣按鳳梧山者在郡城東北十里山脉由郡西外界老脊排列東

突爲是山西北一峰圓聳東南一峰斜騫爲郡中主山阿交合溪自東來逼其麓轉而東北入峽去若避此山者是老龍東北行之脊也一統志無其名止標月狐山在城東北八里環亘五十餘里以舊城計之當卽此山第府志則月狐鳳梧並列似分兩山然以山形求之實無兩山分受也豈舊名月狐後訛狐爲梧因訛月爲鳳耶豈員聳者爲月狐而後人又分斜騫者爲鳳梧耶共西三里南望壑中海子水不甚大而零滙連珠蓋郡城之流東南下楊林之川南來相距於壑口而不相下遂瀦而成浸者坡南下處石漸稜稜露竒又一里行石片中下忽有清泉一泓自石底溢而南出其底中空泉

混混平吐清冽鑑入睂宇又西數步又有泉連瀦成潭乃石
隙迴環中下溢而起汎汎不竭亦溢而南去此潭員若鏡而
無中空之隙不知水從何出然其清冽若不東泉之碧瑩無
纖翳也按郡志八景中有龍泉雙月謂郡城東十里有雙泉
相去十餘步月夜中立其間東西各見月影中逗以余觀之
泉上石環樹罨雖各涵明月恐不移步而左右望中未必能
兼得也又西半里有聚落倚山面壑是爲鳳梧所土人謂之
馬石窩想未置所時其舊名然耳於是西北隨田墜行坡隨
間時有聚落而不甚盛按郡志舊郡址在今城東五里不知
何邨足以當之其西三里有溪流自北塢來中貫田間有石

梁跨之越之西行又三里復有溪自北塢來亦貫田間而石
梁跨之此卽所謂北溪也水在郡城之北爲最近乃城西坡
與鳳梧夾腋中出者越梁又西行一里入尋甸東門停屐於
府治東之旅肆 尋甸昔爲土府安氏世長之成化間始改
流至嘉靖丁亥安之裔孫安銓者作亂搆武定鳳廷文攻毀
楊林馬龍諸州所當道奏發大兵殲之并武定改流乃移尋
甸郡於舊治之西五里直逼西山下始築城甃磚爲雄鎮云
按鳳廷文或又稱爲鳳繼祖又稱爲阿鳳或又稱爲鳳顯祖
自改名鳳廷霄或又云木江西人贅武定土官婦遂專恣作
亂以兵直逼省 後獲而磔之 尋甸四門俱不正蓋因山勢所就也東門
偏于北南門偏於東西門偏於南惟北門差正而又非經行

之所城中惟街二重前重乃府與所所蒞後重爲文廟城隍
察院所倚其向俱東南 尋甸之城直東與馬龍對直西與
元謀對直南與河口對直北與東川對其西北皆山其東南
大谿

二十四日余初欲行偶入府治觀境圖出門左有肆中二儒
冠者問圖志以有版可刷對余辭以不能待己而曰有一刷
而未釘者在城外家中索錢四百余予之過半既又曰須候
明晨乃得余不得已姑需之聞八景中有北溪寒洞在東門
外北山之下北溪水所從出也因獨步往探之遍詢土人莫
有識者遂還步城內後街人儒學城隍諸廟下午還寓作記

是日晴而有風

城中市肆與廣西府相似
賣粟者以火炙而賣之

二十五日晨起往索志其人初謂二本既而以未者釘來止
得上册而仍少其半余畧觀之知其不全考所謂阿交合溪
之下流所載亦正與一統志同惟新增所謂鳳梧山雙龍潭
之類而已乃昇還之索其原價遂飯而行出西門卽上西山
峻甚五里逶迤躡其頂則猶非大龍之脊也其脊尙隔一場
西南自果馬山環界而北乃東度而爲月狐從其北度之岫
又南走一支橫障於東卽此山也志稱爲隱毒山謂山下有
泉爲隱毒泉蓋是山之西與老龍夾而中窪內成海子較南
海子頗長而深是山之東有泉二派一出於北今名爲一出
北溪

於南脫數字而是山實南北俱屬于大脊焉由其西向西南下

二里抵塢中有小坑瀦汚流不甚大也西涉塢一里半草房數間倚南坡上為黑土坡哨前有岐西北由塢中行為潘金魏所道西南上坡為正道余乃陟坡一里復南逾其岡岡頭多智井中陷草莽翳之或有聞水聲潺潺者越岡南行二里餘乃下坡遂與西海子遇其水澄碧深泓直漱東山之麓路既南臨水湄遂東折而循山麓行南向二里見其水汪汪北轉環所逾智井之岡南抵南岡東逼山麓而西瀕所聚焉蓋惟西北二面大脊環抱可因泉為田而三所屯托之所謂潘所金所魏所也

乃土官三姓

三所在海子西與余所循山麓隔水

相望是水一名清海子一謂之車湖水瀕山麓清徹可愛然涸時中有淺處可徑而南也今諸山岡支瞰其間湖水紆折迴抱不啻數十里一統志謂四圍皆山者是謂周廣四里則不止焉想從其涸時言也又南一里東逾一瞰水之岡又陟漱水之坡南向一里海子南盡遂西南逾岡而行岡不甚峻而橫界於東西兩界之間皆廣坡漫衍由其上南行四里稍南下忽聞水聲已有細流自岡西峽墜溝而南矣有數家在西山下曰花箐哨始知其岡自西界老脊度脉而東峙為東界北走而連屬於鳳梧之西岫是為隱毒山中環大窪而清海子豬焉南走綿聳於河口之北崖是為堯林山前挾交溪

遊記 滇二
而果馬水入焉不陟此岡不知此脈乃由此也於是隨水南
行皆兩界中之坂隴或涉西委之水或逾西垂之坡升降俱
不甚高深而土衍不能受水皆不成畦然東山逶迤而不峻
西山崇列而最雄路稍近東山而水悉溯西山而南焉則花
箐諸流之下洩于果馬溪者又楊林之源矣南行二十五里
始有聚落曰羊街子其西界山至是始開峽重巒兩疊湊列
中有懸箐焉由此而入是爲果渡木朗乃尋甸走武定之間
道蓋西界大山北向一支自西南橫列東北起嶂最高如重
蓋上擁南向一支亦自西南橫列東北排巒稍殺如外幔斜
騫雖北高南下而其脈實自南而北疊而中懸一箐爲叢薄

爲中通之隙焉是曰果馬山而南北之水由此分矣羊街子
居廬頗聚又有牛街子在果馬溪西大山下與羊街子皆夾
水之市皆木密所分屯於此者蓋花箐而南至此始傍水爲
塍耳時方下午問前途宿所必狗街子去此尙三十里恐行
不能及途人皆勸止遂停憩逆旅草記數則薄暮雨意忽動
中夜聞潺潺聲

二十六日晨起飯後雨勢不止北風釀寒殊甚待久之不得
已而行但平坡漫隴界東西兩界中路從中而南雲氣充塞
兩山漫不可見而寒風從後擁雨而來傘不能支寒砭風刺
兩臂僵凍痛不可忍十里稍南下有流自東注於西始得夾

路田畦蓋羊街雖有田畦以溪傍西山田與路猶東西各別耳渡溪南復上坡二里有聚落頗盛在路右曰間易屯又北一里半南岡東自堯林山直界而西西抵果馬南山下與果馬夾溪相對中止留一隙縱果馬溪南去溪岸之東山阻溪不能前遂北轉溯流作環臂狀又有邨落倚所環臂中東與行路相向詢之士人曰果馬邨從此遂上南岡平行岡嶺二里是爲尋甸雲南之界蓋其嶺雖不甚崇自南界橫亘直湊西峯約十餘里橫若門闕平若堵牆北屬尋甸南屬嵩明由此脊分焉稍南路左峰頂有菴二重在松影中時雨急風寒急趨就之前門南向閉莫可入從東側門入一老僧從東廡

下煨揆見客殊不爲禮禮佛出將去之一爨下僧

號德

出留

就火薪不能然遍覓枯槎焙之就炙濕衣體始復蘇煨栗淪茶腸始回温余更以所攜飯乘沸茶食之已午過矣零雨漸收遂向南坡降三里抵坡下卽楊林海子之西塢也其處遙山大開西界卽嵩明後諸老龍之脊東界卽羅峰公館後分支爲翠峰祖脊相對夾成大壑海子中滙焉其南楊林所城當鎖鑰其北堯林山扼河口海東爲大道所經海西爲嵩明所履但其處竹樹漸密反不遑遠眺大道東南去乃狗街子道岐路直南去爲入州道余時聞有南京僧在狗街子州城大道之中地名大一半邨者欲往參之然後入州乃從岐道

下竹坑間行一里有大溪自西北環而東注卽果馬溪之循
 西山出峽至是放而東轉者橫木梁跨石湫上湫凡三木砥
 三跨而達涯之西其水蓋與新橋石幢河相伯仲者也既度
 卽平曠遙達邨落環錯西南直行六里而抵州由塍中東南
 向遵小徑行二里過小一半邨又一里有大路自東北走西
 南是爲狗街子入州之道道之北卽爲大一半邨道之南卽
 爲玉皇閣入訪南京師已暫棲州城某寺其徒初與余言後
 遂忘之南京僧號
 金余遂出從大道西南入州二里又有溪自西而東向注其
 水小於果馬之半而頗急石卷橋跨之越而西南行瀕陷殊
 甚自翠峰小路來雖久雨之後而免陷淖之苦以山徑行人

少也一入大路遂舉步甚艱所稱蜀道不在重崖而在康莊
 如此又三里而抵西山下轉而西南又一里而入嵩明之北
 門稍轉東而南停於州前旅舍問南京僧忘其寺名無從覓
 也

二十七日密雲重布雖不雨不霧而街濕猶不可行余抱膝
 不下樓作書與署印州同張拒不收又以一刺投州目管雖
 收而不卽荅初是州使君爲吾郡鈕國藩武進鄉薦余初入滇已
 遷饒州別駕至是東其轅及月矣二倅皆南都人余故以書
 爲庚癸呼乃張之扞戾乃爾始悔彈鋏操琴之拙也是日買
 得一野鳧烹以爲供

二十八日晨起濃雲猶鬱勃惟東方已開余令肆婦具炊顧僕候管倅回書余乃由州署西踐濕徑北抵城隍廟其東為察院其中北向登山數級右為文廟左為明倫堂尊經閣登閣天色大霽四山盡出始全見海子之水當其前是海子與楊林共之即統志所云嘉利澤也以果馬巨龍江及白馬廟溪之水為源而東北出河口為北盤江之源者也由中路再上抵文廟後夾衢西入與文廟前後並峙者是為宗鏡寺于唐天祐中寺古而宏寂踞蛇山之巔今謂之黃龍山山小而石骨稜稜乃彌雄山東下之脉起而中峙如錐州城環之為州治之後山者也昔多小黃蛇故今以黃龍名之登此則一州之形勢盡在目

中矣 嵩明舊名嵩盟一統志言州治南有盟蠻臺故址昔漢人與烏白蠻會盟之處而今改為嵩明焉州城亦因山斜繞門俱不正其向與尋甸相似 嵩明正北由大山峽口入竟日而通普岸嚴章為尋甸西境正南隔嘉利澤與羅峰公館對為楊林北境正東為堯林山踞河口之北為下流之砥柱正西逾嶺為舊邵甸縣其北之梁王山為老龍分支之處領挈眾山為本州西境與尋甸富民昆明分界者也 嵩明中環海子田澤沃美其西之邵甸南之楊林皆與壤也昔皆為縣而今省去楊林當大道今猶存所焉 出寺下山還飯於店而管倅回音不至余遂曳杖出南門轉而西半里抵塔

遊記 滇二
下大道東南由楊林去余時欲由兔兒關乃西南行一里有
追呼於後者則管倅以回束具程命役追至而程猶置旅寓
中因令顧僕返取余從間道北向法界寺待之法界寺者在
城西北五里亦彌雄山東出之支突爲崇峯者也路當從西
門出余時截岡逾隴下度一竹塢二里而北上山躡坡盤級
而上二里逾一東下之脊見北塢有山一支自頂下垂而殿
宇重疊直自峰頂與峰俱下路有中盤峒中者有直躡峰頂
者余乃竟躡其頂一里及之西望峰後下有重壑壑西北有
遙巘最高如負辰挈領擁列迴環瞻之甚近余初以爲嵩明
之冠而不知其卽梁王之東面也轉而東峰頭有元帝殿冠

其頂門東向余又叩畢問所謂南京師者仍不得也先是從
城中寺觀覓之不得有謂在法界者故余復迂途至而豈意
終莫可踪跡乎由殿前東向下歷級甚峻半里得玉虛殿亦
東向仍道宮也兩傍危箒迴合其境甚幽再下出天王殿又
下半里有一番當懸岡之中深竹罨門重泉夾谷幽寂窈窕
惜皆閉戶無一僧在又下始爲法界正殿先入殿後懸臺之
上其殿頗整有讀書其中者而主僧仍不在乃下禮佛正殿
甫畢而顧僕亦從塢中上東廡有僧出迎詢知南京師未嘗
至而仰觀日色尙可行三十餘里遂詢道於僧更從北徑爲
邵甸行蓋楊林爲大道最南而迂兎兒爲中道最捷而坦邵

旬爲北道則近依梁王最僻而險余時欲觀其挈領之勢遂
取道焉由寺前西南轉竹箐中隨岫而南一里逾東南岡出
向所來道遂南下山一里抵山下有塢自西北來卽前嶺頭
下瞰重壑之第一層也由其南橫度而西南二里過一邨邨
南始畦塍相屬隨塍南下西行畦中一里餘望見北岡垂盡
處石崖駢沓其東邨廬倚岡上爲靈雲山而有神宇臨壑是
爲白馬廟神宇之西有塢自北山廻環而成峽有大溪自峽
中東注而出卽前嶺頭遙瞰之第二層也其壑西南始遙逼
梁王最崇峰之下蓋梁王東突聳懸中霄北分一支東下爲
靈雲峯卽白馬所倚再北分一支東峙爲法界寺法界北壑

雖與梁王對夾而靈雲實中界焉故梁王東麓之溪濚注俱
從此出也其流與東山之巨龍江相似東西距州城遠近亦
相似也溪無橋涉之卽西上坡始余屢訊途人言渡溪而西
必宿大大邨邨之東皆層岡絕嶺漫無邨居問去邨若干里
曰三十余仰視日色當已不及而土人言不妨行速行而再
問皆然遂急趨登坡一里有負戴而來者再問之曰無及矣
不如返宿爲明晨計余隨之還仍渡溪入白馬廟廟敞甚不
堪托宿乃東過駢沓石崖從邨廬之後問宿於靈雲山僧是
菴名梵虛僧雖不知禪誦而接客有禮得安寢焉
二十九日晨起碧天如洗亟飯仍半里渡溪躡西坡而上迤

遇五里逾岡脊東望嘉利澤猶在足下西瞻梁王絕頂反爲近支所隱不可見計其處正當絕巘之東此卽其支岡也岡頭多中陷之坎枯者成脊井渚者成天池稍西北盤岡一里復西南下一里度中窪之底復西北上行山南嶺坡間二里復西南下塢中其塢自西北崇峰夾中來中有流泉頗急循塢西崖東墜此梁王山東南之流也有岐路直自塢外東南來直西北向梁王山東腋去此楊林往普岸嚴章徑余交截之而西半里渡西涯急流復西北躡岡上頗峻一里又峰頭已正當梁王山之南矣西向平行嶺頭一里又西下半里塢有小水猶東南流也一里徑塢又西上逾嶺半里復下其嶺

南北俱起崇峰夾之水已西南行余以爲過脊矣隨之下一里行峽中轉而南一里又有水自西北來同墜壑東注而下嘉利澤始知前所過夾峰之脊猶梁王南走之餘支也越水復西北躡峻而上一里半抵峰頭則當梁王山之西南矣是峰西南與南來老脊又夾坑東北下嘉利澤是峰東北與梁王主峰亦盤谷東下嘉利澤從脊上平行而西一里餘出西岡半里始見其脉自南山來者從此脊之西北下伏而再起遂轟峙梁王焉梁王山者按志無其名余向自楊林西登老脊已問而知之云在邵甸東北故余取道再出於此正欲晰其分支界水之源也然志雖不名梁王其注盤龍江則曰源

自故邵甸縣之東山西山則指此爲東山矣其注東葛勒山則曰在邵甸縣西北高三十里爲南中名山遠近諸峯高無踰此則所謂三十里者又指此爲東葛勒山矣但土人莫諳舊名因梁王結寨其頂遂以梁王名之志無梁王名未嘗無東葛勒名也其脈自澂江府羅藏山東北至宜良分支東北走者爲翠峰之支正支西北走者由楊林西嶺而北度兔兒關又北度此而高聳梁王山橫亘於邵甸之北其東西兩角並聳東垂下臨白馬溪之西西垂下臨牧養澗之東由西垂環而西南爲分支則文殊商山之脈所由衍也由東垂走而東北爲正支則果馬月狐之脊所自發也西垂曲抱而盤龍

之源遂濬滇海東垂橫夾而嘉利之派遂滙北盤宜其與羅藏雄對南北而共稱梁王云過脊漸西降西瞰夾塢盤窩皆豐禾芄芄不若脊東皆重岡荒磧也一坡西垂夾塢中上皆側石斜卧從其上行二里始隨坡下墜一里及塢有小溪自東南塢中出越之西行又半里有邨聚南山下皆瓦房竹扉山居中之最幽而整者是曰大大邨始東西開塢梁王山西南之水由塢北西注余所越南塢之水截塢而從之半里越邨之西又開爲南北之塢有小水自南來經西岡下北合於東塢之水同破西北峽而下墜當西出於邵甸之北者也路越南來小水遂西南上坡盤坡而上約里許越其巔又西下

半里西南涉溪其溪似南流者一里又西逾坡脊平行坡上
又一里餘始見西塢大開其塢自北而南闕夾甚遙而環峰
亦甚密塢中豐禾雲麗邨落星羅而溪流猶僅如帶若續若
斷焉於是陡降西麓半里抵塢有邨倚麓西而廬是曰甸頭
邨卽邵甸縣之故址也是邨猶偏於塢東塢北有峰中垂亦
有聚廬其上其地去嵩明州四十里重巒中間另闕函蓋正
北則梁王正脊亘列於後東界卽老脊之北走者西界卽分
支之南環者其西北度處有岫頗平是通牧漾東北循梁王
山東垂而北是通普岸嚴章西逾嶺通富民縣東逾嶺卽所
從來者惟南塢最遠北自甸頭十里至甸尾塢中之水南至

甸尾折而西南去路亦逾山而西遂爲嵩明昆明之界焉余
旣至甸頭邨卽隨東麓南行一里有二潭瀦東涯下南北相
並中止有岸尺許橫隔之岸中開一隙水由北潭注南潭間
潭大不及二丈而深不可測東倚石崖西瀕大道而潭南則
祀龍神廟在焉潭中大魚三四尺汎汎其中潭小
而魚大且不敢捕以爲神物也甸頭之水
自北來流於大道之西潭中水自潭南溢流大道之南已而
俱注於西界之麓合而南去路則由東界之麓相望而南塢
中屢過邨聚八里有小水自東峽出西入於西麓大溪踰之
南二里則甸尾邨橫踞甸南之坡有岐直南十里通兔兒關
正路則由邨西向行一里餘直抵西界之麓有石梁跨大溪

上逾梁始隨西麓南行半里溪水由西南盤谷而入路西北向逾嶺一里登嶺頭一里下嶺西塢中路復轉西南行大溪尙出東南峽中不相見也蓋其東老脊南自宜良經楊林西嶺度而北一經兔兒關其西出之峰突爲五龍山則挾滙流塘之水而出松花壩者也再北經甸尾東其峰突爲祭鬼山則挾邵甸之水而西出滙流塘者也於是又西越塢脊四里隨塢西下一里又有水自北峽來有梁跨之其勢少殺於甸尾橋下水有邨在梁之西是爲小河口卽牧漾之流南經此而與邵甸之水合而出滙流塘者也過邨又西南上嶺盤折山坡者七里中有下窪之習旣而陡下峽中有小水自西北

峽來渡之邨聚頗盛邨之南則邵甸之水已與小河口之流合而西向出峽至此復折而南入峽中是爲滙流塘其縈迴之勢可想也從此路由西岸隨流入峽其峽甚逼夾翠駢崖中通一水路亦隨之落照西傾窈不見影曲折四里有數家倚溪北岸是爲三家邨投宿不納蓋是時新聞阿迷不順省中戒嚴故昆明各邨俱以小路不便居停爲辭余強主一家久之乃爲篝火炊粥啟戶就榻焉

盤江考

附

南北兩盤江余於粵西已睹其下流其發源俱在雲南東境余過貴州亦資孔驛輒窮之驛西十里過火燒鋪又西南五

遊言滇二
里抵小洞嶺嶺北二十里有黑山高峻爲眾山冠此嶺乃其
南下脊嶺東水卽東向行經火燒鋪亦資孔乃西北入黑山
東峽北出合於北盤江嶺西水自北峽南流經明月所西塢
東南出亦佐縣南下南盤江小洞一嶺遂爲南北盤分水脊
一統志謂南北二盤俱發源霑益州東南二百里北流者爲
北盤南流者爲南盤皆指此黑山南小洞嶺一東出火燒鋪
一西出明月所二流也後西至交水城東中平開巨塢北自
霑益州炎方驛南踰此經曲靖郡塢亘南北不下百里中皆
平疇三流縱橫其間滙爲海子有船南通越州州在曲靖東
南四十里舟行至州水西南入石峽中懸絕不能上下乃登

陸十五里復下舟南達陸涼州越州東一水又自白石崖龍
潭來與交水海子合出石峽乃滇東第一巨溪也爲南盤上
流云余憩足交水聞曲靖東南有石堡溫泉勝遂由海子西
而南南下二十里一溪來自西北轉東南去入交海橋跨之
爲白石江涓細僅闊數丈名獨著以沐西平首破達里麻於
此遂以入滇也按達里麻以師十萬來拒與我師夾江陣是
日大霧沐分兵從上流潛濟繞出其後遂破之今觀線大山
溪何險足據且白石上流爲戈家冲源短流微濚帶不過數
里內沐公曲靖之捷誇爲冒霧涉江自上流出奇爽攻之爲
不世勲不知乃與坳堂無異也度橋南六里抵曲靖郡出郡

遊言滇二
南門東南二十五里海子汪洋漲溢至是爲東西山所東南
下伏峽間橋橫架交溪上曰上橋橋西開一塢東向卽由上
橋西折入塢半里至溫泉泉可浴泡珠時發自池底北池沸
泡尤多對以六角亭曰噴玉東踰坡半里抵橋頭邨邨西行
田疇間忽一石高懸四面翳叢樓楹上出卽石崖堡也與温
泉北隔一塢徑平畦里許抵堡東麓南向攀級上凌絕頂則
海子東界山南繞於前西界山自北來中突爲此崖又西峙
而南爲水口山交溪南出上橋前爲東界山南繞所扼輒西
南滙爲海子正當石堡南其東北白石崖龍潭與東南亦佐
之水合交溪下流於越州乃西南破峽去而石堡正懸立衆

峰中諸水又滙而濚之危崖古松倍見幽勝北下山西一里
抵石堡邨迴眺石堡西北兩面嵌空竒峭步步不能去由邨
南下坡東半里逾一石梁南走梁下者卽交溪溪遂折東南
去又東一里半抵東山麓東北上山從石片中行土傾峽墜
崩嵌紛錯石骨競露如裂瓣從之傾折取道石多幻質色正
黑如着墨片片英山絕品石中上者一里至嶺坳下見西塢
南流之江下墜嶺南之峽乃交溪山橋頭南下橫截此山南
麓以東去者也余已躬睹南盤源聞有西源更遠直西南至
石屏州隨流考之其水源發自石屏西四十里之關口流爲
寶秀山巨塘又東南下石屏滙爲異龍湖湖有九曲三島周

一百五十里島之最西北近城者曰大水城頂有海潮寺稍東島曰小水城舟經大水城南隅有芟荷百畝巨朶錦邊湖中植蓮此爲最盛水又東經臨安郡南爲瀘江穿顏洞出又東至阿迷州東北入盤江盤江者卽交水海子南經越州陸涼路南寧州至州東六十里婆兮甸合撫仙湖水又南至播箕街河甸合曲江又東至阿迷州稍東合瀘江二江合爲南盤江遂東北流廣西府東山外余時微諸廣西土人竟不知江所向乃北過師宗州又東北去羅平州十五里抵一塢曰興哆囉其塢西傍白蠟東瞻羅莊南去甚遙而羅莊山森峭東界皆石峰離立分行競奮復見粵西面目蓋此叢嶽怪峰

西南始此而東北盡于道州磅礴數千里爲西南奇勝此又其西南之極也已而至羅平詢土人盤江曲折始知江自廣西府流入師宗界卽出羅平東南隅羅莊山外抵巴且彝寨會江底河寨去羅平東南二百里江東卽廣南府境又東北經巴澤河格巴吉興隆那貢至霸樓爲霸樓江六處地名俱官司地今安隆無土官俱爲廣南四城所占遂入泗城境之八蠟者香於是爲右江再下又有廣南富州之水自者格經泗城之葛闔厯裏來合而下田州云後余至雲南省城過楊林見北一海子特大古稱嘉利澤北成大溪出河口溪北有山甚峻曰堯林山又東北十里出峽經果子園北至尋甸府合郡城西北水滙爲

遊記 滇二
南海子又東北與馬龍水合于郡東二十里七星橋爲阿交
合溪余因究水所出知其下霑益州爲可渡河乃北盤江上
流也按此則南北二盤但名稱之同耳發源非一山之水北
盤自可渡河而東始南合亦資孔火燒鋪之水則火燒鋪非
北盤之源也南盤自交水發源南渡越州始合明月所之水
則明月所非南盤之源也乃一統志北盤捨楊林南盤捨交
水而取東南支分者爲源則南北源一山之悞宜訂正者一
又以南盤至八蠟者香一水自東北來合土人指以爲北盤
江遂謂南北盤皆出於田州夫北盤過安南已東南下都泥
由泗城東北界經那地永順出羅木渡下遷江則此東北合

南盤之水自是泗城西北箐山所出謂兩江合於普安州泗
城州之悞宜訂正者二至統志最悞處又謂南北二盤分流
千里會於合江鎮蓋惟南寧府西左右江合流處爲合江鎮
是直以太平府左江爲南盤田州右江反爲北盤矣今以余
所身歷綜核之南盤自霑益州炎方驛南下經交水曲靖南
過橋頭由越州陸涼路南南抵阿迷州境北合曲江瀘江始
東轉漸北合彌勒巴甸江是爲額羅江又東北經大柏塢小
柏塢又北經廣西府東八十里永安渡又東北過師崇州東
七十里黑如渡又東北過羅平州東南巴且寨合江底水經
巴澤巴吉合黃草壩水東南抵霸樓合者坪水始下舊安隆

出白隘爲右江北盤自楊林海子北出嵩明州果子園東北
經熱水塘合馬龍州中和山水抵尋甸城東北去彝地爲車
洪江下可渡橋轉東南經普安州北境合三板橋諸水南下
安南衛東鐵橋又東南合平州諸水入泗城州東北境又東
注那地州永順司經羅木渡出遷江來賓爲都泥江東入武
宣之柳江是南盤山南甯北盤出象州相去不下千里而南
寧合江鎮乃南盤與交趾麗江合非北盤與南盤合也其兩
盤江相合處直至潯州府黔鬱二江會流時始合但此地南
北盤已各隱名爲鬱江黔江矣則謂南盤北盤卽爲南寧左
右江之悞宜訂正者三若夫田州右江源明屬南盤志書又

謂源自富州是棄大源而取支水猶之志南盤者源明月所
志北盤者源火燒鋪也彼不辨端末巨細悍然秉筆類一坵
之貉也夫

裔孫 熙海南校字

